



**2017an erreserban gelditutako zazpi dirulaguntza eskaera orain jaso dituzte udalek / 5**

**Aritzalko basoa faunarendako pasabidea izateko laguntza eskatu dute European / 11**

**Maitane Vilariño Mendinueta olaztiarra Osasunarekin 1. mailara igotzeko borrokan dago / 17**

**Sakanako Ibilaldiaren ordezt, Irurtzongo Mendi Jarduerak antolatu ditu Iratxok / 18**

**Maria Pinto Balserak Altsasuko haurtzaroko oroitzapenekin liburua idatzi du / 21**

# "Ni argazki artean jaio nintzen"

**MARIA ISABEL ZORNOZA GARCIA** IZOR ARGAZKI DENDAKO NAGUSIA  
80 urteko ibilbidearen ondoren, Altsasuko Izor argazki dendak gaur itxiko ditu ateak. Izan ere, bertako nagusiari jubilatzeke garaia iritsi zaio

**Alfredo Alvaro Igoa** ALTSASU

Aitak hasi zuen argazkilaritza negozioari segida eman zioten bi alabek eta semeak. Kale Txikiko denda gaur azkenekoz zabalduko du Maria Isabel Zornoza Garciak. "Nahigabea eta pena sortu dit erabakia hartzeak". 15 urteetatik ari da argazkiak egiten. Bizi guztia argazkiak egiten eman du eta bere argazkilari jardunak ezagun egin du sakan-darren artean. "Mundu guztiak Maribel edo Mari Izor gisa eza-gutzen nau".

**Zeinek sortu zuen denda?**

Aitak, Isidro Zornoza. Horregatik deitzen da denda Izor; I hori Isidro izenetik hartua eta, segida, abizenaren hasieratik.

**Noiz zabaldu zen denda?**

Lehen argazkilari ibiltaria eta galeriadun argazkilaria zuden, eta aitak bi lizentziak zituen. Duela 80 bat urtez ari naiz, gu jaio aurretik argazkilaritza ari baitzen. Ibiltari bezala herri guztietako festa guztietara joanez lan egiten zen. Jendeak ez zuen argazki makinari, eta telefono mugikorrek ez ziren existitzen. Festetan ateratzen zituen argazkiak jendeak. Ez da orain bezala, milaka argazki daudela; lehen ezohikoa zen argazkiak izatea. Gainera, argazkilaria zen argazkia egiten zuena. Galeriako ar-

gazkiak egiten zituen, baina etxean, dendarik gabe.

**Herrietara joaten zenean, argazki-erakundeak hondoak eramaten zituen?**

Nortasun agiri moduko argazkiak egin behar bazituen bakarrik. Herrietara ere horretara joaten baitzen. Lehen, nortasun agiriak egitera poliziak herrietara hamar urtean behin etortzen ziren. Hamar urtero argazkilaria deitzen zuten eta, orduan, bai, parafernalia guztia eramaten zen. Galerian, irudidun hondoak zituzten argazkiak egiten zituen.

**Eta zein kamerarekin joaten zen?**

Tripodedun haietako bat, hauspoa zuenetako batekin. Gerora kamera arruntekin, argazki filmdunak. Estudioan kristalezko plakekin, zeluloiderik ez baitzegoen. Eta marka guztietako argazki makinak, 35 mm-koak. Gero 4x6koak, 6x6koak profesionalagoak, Hasselblada, horiek ezkontza eta halako erreportajeetarako erabiltzen genituen.

**Azkenean denda zabaldu zen.**

Eraikin hau jaso zenean, lokala erosi zen. Denda mustu zela aurki 49 urte eginen ditu. Baina ordurako aitak urteak zeramatzen lanean. Gero ni baino zaharragoak diren anai-arrebak jaio ziren: Mari Carmen eta Angel (2018an zendua), eta gero ni, gazteagoa naizela. Ni argazkien artean jaio

nintzen, aita argazkilaria zelako eta anai-arrebak dagoeneko argazkiak egiten zituztelako; arrebak orduan hasi zen.

**Eta Isidro nondik zuen argazkizaletasuna?**

Egia esan, ez dakit. Beti oso artista izan da, hau guztia asko gustatu izan zaio. Argazkilaria izateko gustu pixka bat izan behar baitzuten. Lehen argazkiak txuri beltzean ziren eta aitak argazkiak "argizatzen" zituen. Hau da, koloretako txinatar tintekin berak bere koloreak egiten zituen, mordo bat zituen, eta estudioko argazkiak margotzen zituen. Arropei eta besteei kolorea ematen zien. Halakoak egiten zituen.

**Festak bai, baina ezkontza erreportajeak ere eginen zituen, ezta?**

Makina bat. Aitak egindako argazkirik ez duen eskualdeko etxea arraroa izanen da; gero arrebak, anaiak eta, berriki, nik. Lehen, argazki bat egiterakoan, zertan ari zinen ederki jakin behar zenuen. 36 argazki besterik ez baitzuden. Eta makina profesionalagoak, ezkontzetan erabiltzen genituenak, 6x6 formatukoak, gehienez 24 argazki zeuden. Beraz, argazkia oso ongi pentsatu behar zenuen. Eskuz enfokatu behar zen. Enkoadraketa ongi begiratu behar zen, agertzen zena agertzen zen,

ez zegoen egungo argazki moldaketarik. Eta, jakina, argiztapena. Lehen moldaketak, konponketak, argiztatzeak ondoren egiteko aukerarik ez baitzegoen. Ateratzen zenuen argazkia ateratzen zenuen. Gainera, ateratzen zenuena ordaindu behar zenuen. Guk txuri beltzeko argazkiak hemen landu ditugu: bainuak, handitzailea, lanen arabera bestelako handitzaileak... dena hemen egin da. Baina koloretako argazkia etorri zen eta lanak kanpoko koloreko laborategietara bidali behar genituen. Eta kanpora bidaltzen zenuen guztia, gero saldu edo ez, pagatu beharra zegoen.

**Herri askotara mugitzen zineten?**

Ezkontzetara Gipuzkoara joaten ginen. Agurainen, Araian eta Eginon pila egin ditugu. Baina festetara, gehien bat, Sakana zen. Bakaiku, Iturmendi, Urdiain. Aita askotan joaten zen. Eta, San Pedrorra. Guk, betidanik, Sanpedrozelaiko zuhaitz beraren azpian bazkaltzen dugu, ermitaren ondoan; hori sakratua da. Ni neskatona nintzenerako jendeak argazki makinak zituen, baina gutxi. Aitak, bi arbolen artean pankarta bat jartzen zuen, eta kuadrillak hara joaten ziren talde argazkiak egitera. Argazkiak eginda, haiek erostera dendara etorri behar zuten. Batzuetan, nortasun agirien argazkiekin, etxetara argazkiak eramaten zituen aitak.

**Estudio lanak ere ugari eginen zintuzten, ezta?**

**"LEHEN, ARGAZKI BAT EGITERAKOAN, ZERTAN ARI ZINEN EDERKI JAKIN BEHAR ZENUEN, 36 ZEUDEN"**

**"TEKNOLOGIA DIGITALAREKIN IRUDIMENEAN DUZUN GUZTIA SORTZEKO AUKERA DUZU"**

Bai, lan asko egin dugu. Haurrenak, jaioberrienak... denetarik. Estudioan aitzindariak izan ginen. Aitari azken teknologiak eta gauzak izatea gustatzen zitzaien. Gaur egun dauden kroma eta halakoak (irudiaren atzealdean digitalki beste irudi bat sartzea) ez zeudenean, hondoak proiektatzeko sistema bat izan genuen. Ordurako berritasun handia zen. Nahi zenituen hondoak jarri zenitzakeen, nahiz eta estudioa txikia izan. Haurren eta jaunartzeetako halako argazkiak jende ugari ditu.

**Ezkontza albumak aldatu dira.**

Beti daude paisaiak, beti kalean egin dira argazkiak. Lehen, ezkontzaren ondoren, lau gauza egin, eta kitto. Lehen ez ziren bikoteen erreportajerik egiten, ez zegoen modan. Eliza barruan argazki batzuk egiten ziren, bikotearenak, aldre ondoan. Baina orain ezkongaietara egiten zaien moduko erreportajerik ez zitzaien egiten. Orain, askotan, ezkongaietara aurretiko argazkiak egiten zaizkie. Jendearen argazkiak egiteko sistema eta gustuak asko aldatu dira. Eta, jakina, albumak izugarri aldatu dira. Larruzko album zoragarriak ziren, orain ez daudenak, eta argazkia albumeko orrietara itsatsia zegoen. Orain album digitalak daude eta egin ditzakezu muntaiak, konposizioak, marrazkita pasa... milaka gauza.

**Erreportajeak egin dituzue?**

Eskatzen ziguten mota guztietako lanak egiten genituen guk. Aita eta anaia EFE agentziako korrespondentak ziren. Anaia Diario de Navarrako argazkilaria zen ere. Gaur egun kazetari guztiak zuen argazki makinarekin joaten zarete eta argazkiak egiten dituzue. Gainera, askoz hobe da. Lehen guk argazkiak egiten genituen eta kazetariak testua. Desberdina zen. Beraz, zer edozer zegoenean anaia joaten zen, argazkiak egin, etorri, errebelatu, ahalik eta azkarren, eta bidali. Autoz eramaten zen Iruñera, edo, bestela, Burundesaren bidez bidaltzen zen. Iruñetik korrespondent salen bat etorri gero, zain gelditzen zen eta berak eramaten



**EGOKI**  
Ventanas PVC Leihoak

www.ventanasegoki.com

948 563 253 Arkinoturri Industrialdea · Olazti

**EROSOTASUNERAKO PENTSATUAK**

Diseinu soileko lehio berriak

Erakusketa: Olite kalea 16 · Iruñea





Maria Isabel dendako erakusleihoaren parean, San Pedro ermita eta Foru plazako intxaurrondo zaharren argazkiak lekuko direla.

zuen. Sakanako argazkiak ateratzen zituen agentziarako. Anaiak ere Rafael Belarrarekin lan asko egin zuen. Hark Diario de Navarra pilotaz asko idazten zuen, eta anaia berarekin partida guztietara joaten zen. Argazki oinean beti Foto Izor agertzen zen sinatuta. Hainbat hamarkadetan aritu zen, Belarrak pilotarena utzi eta kazetariak kamerekin ibiltzen hasi ziren arte. Argazkilaritzaren arlo guztiak ukitu ditugu. Zeren aita eta anaia bokaziodun argazkilariak baitziren. Argazkilaritza maite zuten.

#### **Nola bizi izan duzue teknologia aldaketa?**

Aldaketa izugarria izan da. Gauza oso sortzaileak egiteko aukera ematen dizu. Ongi dago, irudimenean duzun guztia sortzeko aukera duzu. Askok egokitu behar izan dugu. Makina guztiak berriak erosi behar izan ditugu. Erreportaje profesionaletarako eta estudiorako makina oso onak genituen lehen. Argazkilaritzan onena den bi Hasselblad kamera genituen, haien objektibo guztiekin. Digitala iritsi eta ez zuten ezertarako balio. Teknologia berriarekin zerotik abiatu ginen, ikasi egin behar.

Erosketen arloan izugarri nabaritu zen jendea edozerekin

konformatzen dela. Jendea konforme dago argazkiak telefono mugikorrean sartuta izatearekin. Ez zaio inporta ez inprimatzea eta ez ikustea. Nire ustez konzeptua asko aldatu da. Lehen 36 argazki ateratzen ziren argazki film gehiago ez zegoelako. Nik beti aholkatzen dut orain nahi dituzten argazki guztiak ateratzeko. Milaka, nahi dutena. Baina, gutxienez, bizipen bakoitzetik bat aukeratu dezatela eta paperean inprima dezatela; album batean jar ditzatela. Argazkia beti ateratzen da gustuko duzun, hunkitzen zaituen zerbait dagoenean, edo nahi duzulako. Argazkiak paperean ikustea momentu eder bat oroitzeko da, argazkia egin zenuenean sentitu zenuenera eramaten zaitu argazkia begiratzeak. Niri behintzat. Zeren, gauza bakoitzak bere ueña du: ikusten duzun argia, zuhaitzaren hosto bat... Une hartan gauza bat sentitzen zenuen, eta ikustean sentipena biziberritzen duzu.

#### **Kolorearen erorrera ere aldaketa handia izan zen?**

Bai. Pauso izugarria izan zen. Kolorea iritsi arte guk dena egiten genuen. Jendeak argazkiak ateratzen zituen baina guri ekartzen zizkiguten errebelatzera. Ezohiko zaleren bat kenduta, inork ez

zuen etxean errebelatzekorik. Txuri beltzeko lan guztia gure laborategian egiten genuen. Kolorea iristean, zailagoa zen. Ez da gauza bera. Orduan laborategi handiak zabalitzen hasi ziren. Haiek egunero etortzen ziren, Bilbotik, Iruñetik. Gure lan profesionala Zaragozan egiten zuten. Erabateko aldaketa izan zen eta laborategia itxi egin genuen.

#### **Argazki kamerak saltzen zenituzten?**

Digitala hasi zenean utzi nion argazki kamerak saltzeari. Teknologia digitalak azkar aurreratu zuen. Zuk argazki kamera erosi eta bost hilabetera zaharra zen. 7 megapixe leko kamera erosi zenuen, baina bi hilabetera 15ekoa zenuen. Hain azkar gartzen zen... Beti azken teknologia izateko adina ez zen saltzen. Eta saltzeari uztea erabaki genuen.

#### **Bideoarekin lan egin duzue?**

Sekula. Niretako argazkilaritza eta bideogintza desberdinak dira. Osagarriak, bai. Gu beti argazkilaritzan zentratu gara.

#### **Santa Agedan ikusten zitzaizuen batez ere estudiantik kanpo. Zer moduz halakoetan?**

Ederki. Batere problemarik gabe. Nik uste dut mundu guztiarendako espazioa dagoela. Eta mundu guztiak bere lana egin behar du. Beti ere, errespetuz eta tra-

barik egin gabe egiten baduzu. Sekula ez dugu arazorik izan. Jendeak egoki jotzen duen argazkilariarengana joaten da. Egia da ere, zu abisatu bazaituzte ere, beste toki batzuetara argazkiak erostera joaten direla. Jakina, horretarako askatasun guztia dute. Bakoitzak gogoko duena aukeratzen du. Lan egin duten guztiakin oso ongi moldatu naiz, Kikirekin eta hasten diren neska gazteekin.

#### **Halakoetan kintoak jabetzen dira lanean zaudetela? Errespetatzen zaituzte?**

Bai. Ni poz-posita nago. Niri sekula ez didate keinu edo aurpegi txarrik jarri.

### **"ARGAZKIA EGIN ZENUENEAN SENTITU ZENUENERA ERAMATEN ZAITU HURA BEGIRATZEAK"**

### **"DIGITALAREKIN EROSKETETAN NABARITU ZEN, JENDEA EDOZEREKIN KONFORMATZEN DA"**

**Lehen argazkilarik batzuk aipatu dituzu. Garai batean Matias eta Xenda zeuden. Zer gertatzen da argazkilaritzarekin halako eskaera izateko?**

Ez dakit. Gustatu behar zaizu. Gustatzen bazaizu, bizimodua ateratzeko modua da.

**Argazkilariak badaude, jendeak hala eskatzen duelako da.**

Orain arte hala izan da. Orain gutxiago behar gaituzte, esan bezala, digitalarengatik. Lehen, eguberrietan esaterako, haur txikiak eguberri txartelak egiten ziren familiari bidaltzeko. Orain jendeak telefono mugikorrarekin argazkia egin eta familia guztiari Whatsapp bidez bidaltzen dio. Askok ez doaz argazkilariarengana. Eskaera nahiko jaitsi da.

**Irudi ondare handia duzue. Harekin zerbait egiteko asmorik?**

Momentuz ez dut ezer pentsaturik. Ez da orain bezala. Digitala hasi zenetik oso erraza da dena klasifikatuta eta antolatuta izatea. Lehengoak argazki filmak ziren, eta ez ziren antolatzen orain bezala. Lana egiten zenuen eta ez zenuen orain bezala artxibatzen. Gauza asko denborarekin hondatu egiten dira. Negatiboak eta gauza asko, hartzera zoaz eta hondatuta daude. Momentuz, ez dut pentsatu. Nahikoa kostatzen ari zait ixtea.

#### **Zergatik itxi?**

Jubilazioagatik. Jubilatzeke adina pasatua dudalako. Jubilatuta behar duzun momentua iristen da. Senarra jubilatuta da. Bizitzak osasun pixka bat ematen badit, uste dut eguneroko betebeharratik pixka bat aparte bizitzea merezi dudala. Astelehenera igandera izan delako hau beti. Eta festak badaude, ere. Hori bai, hainbeste urtez, gudan, aitaren eta anai-arrebernean lanean konfiantza izan duen mundu guztia eskertu nahi dut. Gure argazkiak egiteko modua jendeari gustatuko zaio edo ez, gustuko izan du tenak oso fidelak izan dira, eta eskertzekoa da.

**Eta astelehenera zer egiten duzu?** Ez dakit. Dendan jaso beharreko gauzak daude.

**Kamera eskutan izaten segituko duzu?**

Jakina! Kamerarik gabe ez noa inora. Egia da ez dudala kamera handi profesionala eramaten, txikiago bat baizik. Pisua dutelako, eta egun guztia kamerarekin egotean, nabari da. Edonora goazela gelditu egiten naiz. Argazkiak egitea gustatzen zait.



ASTEKOA

YOLANDA OLASAGARRE MENDINUETA

## Bikoteak

Aurreko egunean lagun eta adinkide batekin hizketan erkidego desberdinetako bikoteek (orain arte, izatezko bikote izan edo ezkontzeko beharra izan ez dutenek) pandemia garaian elkartzeko dituzten zailtasunak aipatu zizkidan. Inguruan antzeko egoeran dauden beste bikote batzuk ere badira eta zuek ere inguruan izanen dituzue zenbait adibide. Gauza da bikote egonkor horiek ezin izan dutela haien harremana lehenengo moduan mantendu; esaterako, pandemia artio horietako askok nahikoa zuten astean behin, bitan, oporretarako edo nahi zutenean elkartzea haien bizimodua antolatzen. Baina, pandemia garaian, ezin izan dute ohiko moduan elkartu arau hausterik egin gabe.

Jakina, neurriek adin guztietako jendea harrapatu dute, eta gazteengan ere eragin du. Gazteen kasuan, gainera, egoera zertxobait desberdina da, haien bizi sentimentalera irakitzeko hasieran baitaude eta bikote egonkorra izatearena kasu askotan oraindik ere kili-kolo dagoelako.

Hasieran, bazirudien neurriak denbora motzerako izanen zirela eta, hortaz, jasangarriak; baina egoera luze doa eta martxa honetara luzatuko dela ematen du. Batek daki! Harrigarria egiten zait, hortaz, nola ez zaien horrelako egoerei orain artio konponbidea edo irtenbidea eman eta behin-behinean, modu batera edo bestera, arautu. Hain zaila ote da erkidego bakoitzean erregistro moduko bat egitea eta elkartzeko baimenak ematea aipatutako egoeran dauden bikoteei?

Ez dakit ba nik, baina arazo hauei irtenbidea emateak, apika, beharrezkoagoak diren beste neurri batzuek errazago betetzeko bermea eta amua ere izan daitezke. Eta sarritan aipatzen den neke pandemikoari aurre egiteko moduak. Bizi soziala eta sentimentalera asetzeko neurrien beharrea gaude, nire irudiko.

**GUTUNAK:** Karaktereak, gehienez: 1.900 (hutsuneak barne). **GUAIXEK** eskubidea du gutuna laburtzeko. Gutunak ezin izango dira kapituluka bidali. Gutunak asteazkena 10:00ak baino lehen bidali beharko dira erredakziora. Gutunarekin batera bidali beharrezkoak: egilearen izena eta abizena, NA zenbakia, herria eta harremanetarako telefonoa. Gutuna helarazteko bideak: Foru plaza, 23 - 1., 31800 Altsasu / gutunak@guaixe.eus

## HARA ZER DIEN

### Migratu eta errefuxiatuen ongi etorriaz

#### SAKANAKO ANITZARTEAN KULTURARTEKOTASUN ZERBITZUA

Zer egingo zenuke zuk bat-batean dena utzi beharko bazenu? Duzun guztia maleta batean sartu beharko bazenu? Zer sartuko zenuke bertan? Non geratuko lirarteke zure ametsak?

Nola gustatuko litzaizuke zure helmuga izango litzatekeen lurraldean hartua izatea? Ongi etorririk jasotzea nahi zenuke? Nola sentituko zinateke harrera gizarteak zurekiko zurrumurruak zabalduko balitu? Edota zure familiakoak? Zer sentituko zenuke zuengatik halakoak entzungo bazenu?: "Inbaditzen gaituzte", "lana kentzen digute", "laguntza guztiak beraientzat dira", "COVID-a ere kanpoko horiek ekarri dute"... eta abar?

Nola gustatuko litzaizuke zure seme-alabak ikastetxe berrian hartuak izatea? Zer egingo zenuke zuk zure seme-alabari jaten emateko? Kalitatezko hezkuntza eskaintzeko? Osasuna bermatzeko. Pentsatu al duzu inoiz, guk mugikor bat eduki ahal izateko makina bat haur hiltzen dela esplotazio lanetan, mugikorren osagaietako bat oso kutsagarria delako?

Pentsatu al duzu inoiz, agian zerikusteko handia duela Iparrak, Hegoaldearen migrazioen arrazoietan? Zergatik uste duzu migrazioei inbasioa deitzen zaiela, eta 1492.urteari aurkikuntza?

Oroitzen al zara 1936an makina bat euskaldunek migratu zutela Ameriketara eta beste hainbat tokietara? Eta orain migratzea tokatzen ari zaigula, zer esan beharko diegu harrera gizartei? Zergatik begiraten dugu arrotza balitz bezala ijito komunitatea nahiz eta milaka urte gure artean izan? Pentsatu al duzu inoiz, Giza Eskubideak unibertsaltasunean?

Desberdinak bezain berdinak garelako? Zortedun sentitzen al zara munduko parte honetan jaioa zarelako? Pentsatu al duzu inoiz horretan?

Eta, zer iruditzen zaizu, enpatia pixka bat praktikatzeko saiatzea? Bestearren tokian segundo batez bada ere jartzea?

Zintzoagoa ote da enpatizatu ondotik eskainiko diegun harrera? Atera zure ondorioak. Eskerrik asko.



## OBJEKTIBOTIK



**Altsasu (Gau Hura)**  
@AltsasuDok

**Uste baitugu #AltsasuGauHura lana gure mugez haratago zabaltzea beharrezkoa dela.**

**Injustiziarri aurre egiteko arma pobrea delako isiltasuna.#ApoyaAltsasuDok**

**ALTSASU**  
(GAU HURA)

"ALTSASU (Gau Hura)" crowdfunding-ean parte har ezazu  
Terrorismo bilakatutako parranda gau bat. Bizitza osoa kartzelan pasatzeko arriskua. Arrisku horren erraizetatik grabatutako dokumental bat.  
verkami.com

**guaixe**  
SAKANAKO ATEKARIA

www.guaixe.eus

#### Koordinatzailea:

Goizeder Anton Iturralde  
fundazioa@guaixe.eus

#### GK diseinu zerbitzua:

Ainara Santiago Langarika  
info@gkomunikazioa.eus  
Ainhoa Etxeberria Pikabea  
gk@gkomunikazioa.eus

#### Administrazioa:

Gema Lakuntza Lopez  
admin@guaixe.eus

#### Lege gordailua:

NA-633/1995  
Tirada: 3.200

#### LAGUNTZAILEAK

**Mank**  
s a k a n a

**BAZKIDEAK**



#### Erredakzio burua:

Alfredo Alvaro Igoa  
guaixe@guaixe.eus

#### Erredakzioa:

Maidier Betelu Ganboa  
kirolak@guaixe.eus  
eta Erkuden Ruiz Barroso  
kultura@guaixe.eus

#### Maketzailea:

Iune Trece Obeso  
maketazioa@guaixe.eus

#### Publizitatea:

Eneida Carreño Mundiñano  
publi@guaixe.eus

#### ARGITARATZAILEA:

Guaixe Fundazioa.  
Foru plaza 23-1.  
31800 Altsasu  
948 564 275  
948 562 107 (Faxa)  
618 882 675



**Gobierno de Navarra**  
**Nafarroako Gobernu**



Irañetako Udalak 29.704,99 euroko aurrekontua aurkeztu zuen. ARTXIBOA

## Erreserban gelditutako 2017ko laguntzak, orain

Nafarroako Gobernuaren Toki Inbertsioen Planean jasotako lehendabiziko 120 ekintzen artean daude Sakanako zazpi lan. 2017-2019ko planean onartu ez ziren eta erreserban dauden egitasmoak dira. Herri batzuetan lanak dagoeneko eginak daude

### SAKANA

Udalek eta kontzejuek herrietan lanen bat egiteko ezinbestean Nafarroako Gobernuaren dirulaguntzak behar izaten dituzte. Lanak egiteko aurretik proiektua aurkeztu behar diote foru administrazioari eta gero hark inbertsio planetan sartzen ditu, edo ez. Ibarreko udalek eta kontzejuek 2017-2019 Tokiko Azpiegitura Planerako makina bat lan egitasmo aurkeztu zituzten 2017ko hasieran. Baina Nafarroako Gobernuaren dirua mugatua denez, batzuk aukeratu zituen eta beste proiektu batzuk erreserban gelditu ziren.

Orain, foru administrazioak erreserban zeuden 120 lanendako

dirulaguntzak eman ditu. Sakanako bost udalek eta kontzeju batek guztira 1.086.112,58 euroko inbertsioa egiteko laguntza jaso lukete. Nafarroako Gobernuak, behin behinean, 702.542,7 euro bideratuko lituzke lan horiek egiteko. 2017an onartu ez zitzaizen finantziarioa beste bide batzuetatik lortu eta toki erakunde batzuek proposatutako lanak eginak dituzte, edo egoera aldatu zaie.

Lurralde Kohesiorako Departamentuak, Toki Administrazio eta Despopulaziorako Zuzendaritza Nagusiaren bitartez, 9,21 milioi euro inbertituko ditu Nafarroako 90 herritako udal azpiegiturak hobetzeko. Bernardo Ziriza Perez Lurralde Kohesio-

rako kontseilariak jakinarazi duenez, hurrengo hilabeteetan dirulaguntzen kopurua 16,6 milioi eurora arte iritsiko da, herrietan antzeko lanak egiteko laguntza gehiago banatuko baitituzte.

### Inbertsioak

**Urritzolako** Kontzejuak argiteria publikoa berritzeko 10.550,40 euroko proiektua aurkeztu zuen 2017an. Aurrekontua ordaintzeko Nafarroako Gobernuak 6.330,24 euro eman dizkio orain. Baina joan den urtean jarri zituzten LED argiak herrian eta lehen hilabetero 100 euro pasa pagatzen bazituzten, gaur egun 30en bat pagatzen ditu kontzejuak.

**Irurtzungo** Udalak bi eraikinetan hobekuntza lanak egiteko dirulaguntza jaso du. Bien aurrekontua 87.689,98 eurokoa da. Alde batetik, Atakondoa eskola publikoaren ingurutzalea hobetzera 56.104,54 euro bideratuko ditu eta haietatik 39.273,18 foru administrazioarenak izanen dira. Aitor Larraza Carrera alkateak jakinarazi duenez, lanak udan eginen dituzte eta, horrela, begogailuan aurreztuko dute. Bestetik, kiroldegiaren iparraldeko fatxadaren hezetasun arazoak zeuden eta Irurtzungo Udalak estaldura bertikala hobetu zuen 2017an. Orain foru gobernua 31.585,44 euro aurrekontua zuten lanetarako 22.109,81 dirulaguntza onartu du. Baina, alkateak jakinarazi duenez, azken laguntza hori ez du udalak jasoko.

**Irañetako** Udalak 29.704,99 euroko aurrekontua aurkeztu zuen herriko argiteria berritu eta LED argiak jartzeko. Foru administrazioak 17.822,99 euro ematea aurreikusitako orain. Baina bonbilla gutxi batzuk ezik, Irañeta gehiena dagoeneko LED argiekin argizatuta dago joan den urtetik. Udalak horretarako 19.500 bat euro bideratu zituen, Nafarroako Gobernuak udalei despopulazioari aurre egiteko (16.518 euro) eta pandemiak eragindako gastuei aurre egiteko (3.000 bat euro) emandako dirulaguntzekin pagatu zuena.

**Uharte Arakilgo** Udalak Errekalde kaleko sareak eta zoladura berrituko ditu autobus markesinatik ibairaino. Lanek 703.884,42 euroko aurrekontua dute. Sareak berritzeko lanek 292.560,12 aurrekontua dute eta Nafarroako Gobernuak 204.792,08 euroko ekarpena eginen du. Herriko kalerik luzeenaren (325 bat metro) zoladura lanek 411.324,30 euroko

aurrekontua dute. Haietatik, foru administrazioak 349.625,66 euro emanen ditu.

Txomin Uhartea Baleztena alkateak azaldu duenez, “hiru hilabete ditugu lanen proiektua egiteko. Nafarroako Gobernuak orain hartutako erabakia denez, lan horiek ez ditugu aurrekontuan jasota. Lanak noiz eginen diren ez dakigu oraindik, baina, horren arabera, aurtengo aurrekontuak moldatu edo hurrengoetan jaso beharko lirarteke lanak”. Hala ere, alkateak beste hausnarketa egin du: “Proiektu erakargarria egin nahi genuke. Berrituko den Alde Zaharreko lehen kalea da eta hurrengo berritzea markatuko du. Horregatik, uharterren parte hartzea beharrezkoa litzateke, nolako kaleak nahi ditugun jakiteko. Pandemia egoerak kezka sortzen digu, baina iritziak jasotzeko moduren bat bilatu beharko dugu”.

**Bakaikuko** Udalak ikastetxe-ko estalkia berritzeko 71.341,7 euro bideratzea aurreikusitako 2017ko hasieran. Gobernuak horretarako 49.939,19 euroko ekarpena egitea erabaki du orain. Udaletik azaldu dutenez, eskara aspaldi egin zuten eta dirulaguntza orain jasotzeko ezustean hartu dute.

**Altsasuko** Udalak 182.941,09 euro aurreikusitako udaletxe-ko eranskinean ingurutzale terminala irisgarritasuna ebakuazioa hobetzeko. Nafarroako Gobernuak lan horietarako 12.649,55 euro emanen dizkio.

**GOBERNUAK BESTE 7,39 MILIOI BIDERATUKO DITU ERRESERBAN GELDITU ZIREN LANENDAKO**

# AUKERATU ZURE BIDEA

EZAGUTU EZAZU LANBIDE HEZIKETAKO GURE ESKAINTZA

Ate irekien jardunaldia online

**Maiatzak 8, larunbata**

**11:00etan**

Eman izena  
[www.goierrieskola.eus](http://www.goierrieskola.eus)  
helbidean

# "Herri bakoitzak bere ametsa islatuko du"

**AIZAGA ZEBERIO ETA HAIZEA RAMIREZ DE ALDA** KUTXA BIRAKO ANTOLATZAILEAK Martxoaren 20tik maiatzaren 30era kutxa bat eskuz esku dabil. Geldialdia egiten duen herrietan mezuak jasotzen ari da eta heldu den ostiralean Sakanara iritsiko da

## SAKANA

Kutxa Bira izena du aipatu ekimenak. Hari harrera egiteko taldeak sortu dira geldialdia egiten den herrietan. Sakanara maiatzaren 7an iritsiko da eta Altsasun eta Arbizun geldituko da. Bi herrietan lantalde bana sortu da harrera behar bezala antolatzeko. Haietako bi kidek ekimenaren nondik norakoak azaldu dituzte.

### Zer da Kutxa Bira?

**Haizea.** Kutxa Bira da Iparra Hegoa elkarrekin abian jarritako ekimen bat. Denok dakigun bezala, aurten pandemia dela eta bertan behera gelditu behar izan dira hainbat jai: Korrika, Nafarroa Oinez, Nafarroaren Eguna, Durangoko Azoka... Jai horiek oso garrantzitsuak dira, besteak beste, euskara edo euskal kultura sustatzeko. Edo herri bat garelako, kontzientzia hori indartzeko. Jai horiek guztiak bertan behera gelditzeak hutsune bat utzi digute eta hori betetzeko abian jarri dute aurten Kutxa Bira izeneko beste ekimen bat. Protagonista egurrezko kutxa bat da, barruan Amets Arzallusek idatzitako mezu bat daramana. Helburua Euskal Herri guztiari buelta ematea izanen da.

### Zer da Iparra Hegoa elkarrekin?



Arbizuko eta Altsasuko talde antolatzaileretako ordezkariak.

**Aizaga.** Duela 25 bat urte sortu zen elkarrekin. Uste dut bere garaian sortu zela Urruñako eta Segurako hainbat herritarren ekimenez. Beraien artean harremanak zeuzkaten eta elkarrekin sortu zuten. Helburua euskal kultura eta euskal naziotasuna sustatea da. Iparra Hegoaren daukadan erreferentzia da urte askotan Seguragan egiten zela Euskal Aste bat edo. Baina uste dut urte hauetan beste hainbat herrietan ere beste hainbat ekimen ere antolatu izan dituztela.

### Zer helburua dauzka Kutxa Birak?

**H.** Kutxa Birak aldarrikatzen duena da Euskal Herri euskaldun bat, batu bat eta libre bat. Kutxak Euskal Herriari buelta emanen dio. Herri bakoitzean Amets Arzallusen mezuarekin batera beste mezu bat sartuko da, herri bakoitzak bere aldarrikapena edo ametsa islatuko du. Beraz, alde batetik, euskara, euskal kultura eta herria, baina, baita herri bakoitzaren ametsa ere.

### Kutxan gauzak gordeko dira.

**H.** Bai. Alde batetik, kutxa abiatu zen Amets Arzallusek idatzitako manifestu batekin. Eta

geldialdia egiten duen herri bakoitzean beste mezu bat gehitzen zaio; herri horretan sortutako aldarrikapen edo amets bat. Eta maiatzaren 30ean, Segurara iritsiko denean, denak irakurriko dira.

### Beraz, iristean mezuren bat sartzea tokatzen da. Sakanara noiz iritsiko da?

**H.** Maiatzaren 7an, Altsasura 17:00etan iritsiko da, Aguraindik pasako digute lekukoa.

**A.** Altsasutik Arbizura eramanean dute eta Arbizura 19:00etan iritsiko da.

### Eta zer egingen da? Harrera?

**H.** Hori da. Hainbat taldetako ordezkariarekin taldetxo bat biltzen aste batzuk daramagu. Etortzen dira: Iñigo Aritzeta ikastolako, Zelandi eskolako eta Sagrado Corazón ikastetxeako irakasle eta gurasoak, AEK, Euskal Herriaren Euskaraz, Altsasu Kantuz, Erkuengo ama abesbatza, Zangitu fanfarrea, Altsasuko gaiteroak, Etorkizuna dantza taldea, Altsasuko Gazte Asanblada eta Altsasu gurasoak eta gazteak. Denon artean antolatu dugu egitarautxo bat.

### Bigarren geldialdia Arbizun.

**A.** Egia esan, Arbizun ez daukagu ezer itxita, ezer zehaztuta. Gaur, 18:00etan, harrera prestatzeko bilera irekia deituta dago. Udaletxeko batzar gelan izanen da bilera. Denen artean ekimenari zer forma eman zehaztuko dugu. Ordu bateko kontu bat izatea aurreikusten dugu.

### Kutxa Birak segida du. Arbizuarrei hurrengo geldialdira eramatea tokatuko zaizue?

**A.** Hori da. Guri tokatuko daki-gu Garesera eramatea, hurrengo egunean, 17:00etarako.

### Kutxa Bira kanpora ere badoa, ezta?

**A.** Aurkezpen ekitaldian esan zuten berez kutxak zortzi he-

rrialdeak zeharkatuko ditu; zortzigarrena diaspora dela kontuan hartuta. Hain justu martxoaren 20an abiatu zen Argentinako Viedmatik. Nolabait keinu bat egin nahi zitzaielako Euskal Herrikan kanto bizi diren euskal herritar guztiei. Haiak barne bildu dituen ekimen bat da.

**H.** Eta hemendik pasa ondoren Bartzelonara ere joanen da maiatzaren 13tik 16ra. Frantziara ere joan zen, Réauko espetxetik pasa zen.

### Kutxa Birak bide bat egin du. Beste herrietan egin dutena ttutuka egon zarete?

**A.** Bideo pila bat ari dira bidaltzen eta, tarteka, bakarren bat ikusten duzu.

**H.** Azkenaldian Gipuzkoatik iritsi dira bideo batzuk. Ikusten da txoko guztietako jendea mugitzen ari dela kontu honekin.

### Kutxa Bira gauza puntuala izanen da? Edo betirako?

**H.** Antolatzailerik hasieratik esan zuten, printzipioz, urte baterako kontua zela. Pentsatu nahi dugu urte baterako dela, horrek esan nahiko duelako hurrengo urtean beste betiko jai horiek izanen ditugula. Interesgarria litzateke, nahiz eta aurtengo kontua izan, gero jarraipena emateko moduko zerbait izatea. Adibidez, Altsasun aukera ematen ari da ikastetxeetan ikasleekin gaia lantzeko. Eta interesgarria izanen litzateke behin Kutxa Bira pasata ere bai euskararekin, bai lurraldetasunarekin gauzak egiten jarraitzea.

## "PRINTZPIOZ SOILIK AURTEN, HURRENGO URTEAN BETIKO JAIK GENITUZKEENAREN SEINALE LITZATEKE"

## Nafarroaren burujabetzaren aldeko mugimendua sortu dute

Nafarroa Berriz Altxak erabakiak Nafarroan hartzeko "beharra" aldarrikatu du. Tartean lau sakandar daude

## SAKANA

Herrialdeko historiari keinu ugari eginez aurkeztu zuen bere burua Nafarroa Berriz Altxa ekimenak Iruñeko gotorlekuan larunbatean. Han bildutakoek nafarrei dei egiten zuten "berriro

ere elkarrekin altxa gaitzeen gure subiranotasunaren alde, hori baita Nafarroa justu eta aske baten lanabes eta sehaska bakarra". Amagoia Susperregi eta Joseba Compains bozeramaileek adierazi zuten, "gure

askatasunak babestu nahi ditugu". Garagartzaroaren 30ean 500 urte beteko dira Noaingo bataila izan zenetik, Nafarroako Erresumak bere okupatutako lurraldea askatzeko ahalegina egin zuenetik. "500 urtetik gora dirauen konkistaren ondoren, oraindik orain, egunero erantzuten diogu oraindik ere Nafarroa Espainiaren kide izateko proiektuari. Nafarroa ez baita ez orain ez inoiz Espainia izan eta ez da sekula izanen" adierazi zuten bozeramaileek.



73 sustatzaileetako batzuk. UTZITAKOIA

Ekimenaren sustatzaileek nahi dute "beren etorkizunaren jabe bakarrak diren nafarrak" izatea, "askatasunez eta subiranotasunez adostu eta gauzatzeko". Horregatik, garagartzaroaren 19an Iruñean egingen den manifestazioan parte hartzea deitu dute. Aurretik, maiatzaren 22an, aurkezpenak egingen dituzte herrietan. Sustatzaileen artean daude: Txiki Iriarte Espinal, Iñigo Orella Alzueta, Izaskun Etxebarria Zufiaurre eta Maria Luisa Barandiaran Bengoetxea.

# ARNASA GARA

## EGUNEROKOAN ZER?



**Arnasa Gara** kanpainak, zortzi bideo laburren bidez, euskararen arnaseguneetan ohikoak diren egoerak erakusten ditu, horien inguruan hausnartzeko.

Euskarari bizi-bizirik eusten dioten udalerrriak dira **arnaseguneak**. Euskararen biziberritzean berebiziko garrantzia dute, eta benetako arnasa dira gure hizkuntzarentzat.

[www.arnasagara.eus](http://www.arnasagara.eus)

martxoaren 22tik maiatzaren 14ra

astero bideo bat eta  
elkarrizketa bat



EUSKO JAURLARITZA  
GOBIERNO VASCO

KULTURA ETA HIZKUNTZA  
POLITIKA SAIA  
DEPARTAMENTO DE CULTURA  
Y POLÍTICA LINGÜÍSTICA



Gobierno de Navarra  
Nafarroako Gobernua



UDALERRI  
EUSKALDUNEN  
MANKOMUNITATEA



Maiatzaren 9an autokarabana eta 15ean manifestazioa izanen dira.

## Osasun zerbitzu egokiaren aldeko 671 sinadura

Altsasuarren, olatzagutiarren eta ziordiarren artean jaso dituzte lehen mailako osasun zerbitzu egokia eskatzeko

### BURUNDA

Aldian aldian mediku berri bat. Hori onenean; txarrean, medikurik ez. Otsailean hala gertatu zen, Altsasuko oinarrizko osasun eskualdean sei medikutatik hiru falta izan zirenean. Horregatik, osasun zerbitzuen erabiltzaile diren herritarrei eta profesionaleri "errespetua" eskatzeko ekin zioten sinadura bilketa eta Osasunbidearen Iruñeko erregistroan 671 sinadura aurkeztu zituzten asteartean. Sinatzaileek osasun zerbitzua

hobetzea nahi dute. "Arreta egokia jasotzea, bai administrazioan, harreran edo medikuengatik". Horretarako, ezinbestekoa jotzen dute langileen plantilla handitzea eta bajaran dauden langileen lanpostuak 24 ordutarako beteak egotea. Sinatzaileek telefono bidezko kontsulten ordez aurrez aurreko osasun atentzioa eskatu dute. Aldi berean, medikuek kartilla kopuru txikiagoa izatea eskatu dute, horrela, gaixo bakoitzarekin behar den denbora egoteko. Osasun Kontseilua berriro martxan jartzea ere exigituko dute.

### DUELA 25 URTE...



## Ziordiko jubilatuen bazkaria

Ziordian jubilatuentzako taberna ireki zuten. Gizarte langilearen bultzadarekin herriko jubilatuek elkarte sortu eta udalaren eta gobernuaren dirulaguntzei esker jarduerak egiten hasi ziren. Horiek aurrera eramateko batzordea zuten, Cecilio Gastaminzak, Placido Mendozak, Mari Cruz Baztarrika eta Rosita Perkazek osatuta. 1994ko maiatzaren 1ean, estreinako, jubilatuentzako bazkaria antolatu zuten, eta, arrakasta ikusita, urtero errepikatzen zen.

## Altsasuko Udalak zortzi langabetu kontratatuko ditu

Altsasuko Udalak 8 pertsona langabe kontratatuko ditu, 6 hilabetetarako, lanaldi osoan. Haietako bost Obra eta Zerbitzuen Brigadan peoi gisa lanean ariko dira. Lanpostu horietarako hautagaiek, baldintza orokorrez aparte, Ikasketa Ziurtagiria edo baliokidea izan behar dute, gainera, Errenta Bermatuaren jasotzailea izan behar dute. Beste hiruak lorezaintzan aritzeko dira. Haietan aritu nahi dutenek, baldintza orokorrez aparte, Oinarrizko Heziketa Orokorreko titulua edo baliokidea eta gidabaimena izan beharko dute. Izen ematea maiatzaren 21a baino lehen egin beharko dute Altsasuko Enplegu Bulegoan.



Indusketa lubakia eta araztegia.

## Araztegiako lanen aurreko arkeologia indusketak

Olatzagutiko ur araztegiaren hego mendebaldean, Ornako bide bazterrean eta Koskobiloko harrobiaren azpian. Nilsa enpresa publikoak herriko ur araztegia berri eta handitzeko asmoa du. Baina lanekin hasi aurretik arkeologoak bidali ditu bertan indusketak egin ditzaten, lanek garrantziko arkeologia ondarerik izoratu ez dezaten. Duela bi aste hasi ziren azterketa egiten.

Bestalde, Olatzagutiko Udalak erabaki du herri larreen aprobetxamendua emateko prozedura hastea. Interesa dutenek eta udal ordenantzan ezarritako beharkizun eta baldintzak betetzen dituzten bizilagunek beraien eskaerak maiatzaren 17ra arte aurkez ditzakete.



Bi erizain Pfizerren txertoak prestatzen. ARTXIBOA

## COVID-19ko 125 positibo gehiago aste batean

Apirileko 28ra arte 506 koronabirus kasu zenbatu dituzte. Arbizu eta Etxarri itxita ostegun gauerdia arte

### SAKANA

Apirilaren 15etik 21era 121 COVID-19 kasu zenbatu bazituzten Sakanan, hilaren 22tik 28ra 125 izan dira. Herenegun arte, apirileko lehen 28 egunetan, 506 sakandar gaixotu dira koronabirusarekin. Eta batek baino gehiagok ospitaletik pasa behar izan dute. Bakarren bat, zoritxarrez, hilik bueltatzeko. Pandemia hasi zenetik ibarrean 2.107 sakandar gaixotu dira koronabirusarekin; joan den urtean, bederatzi hilabetetan, 1.170 (%55,52) COVID-19 kasu zenbatu zituen Osasunbideak Sakanan, aurten dagoeneko 937 dira (%44,47). Dagoeneko ibarreko populazioaren %10,39k pasa du gaitza.

Apirileko lehen 28 egunetan Altsasun 144 koronabirus positibo izan dira eta Etxarrin 126. Arbizun 61 zenbatu dituzte eta Irurtzunen 43. Lakuntzan 35 herritar gaixotu dira eta Urdiainen 27. Olatzagutia 17, Iturmendi 11, Uhartea 9, Bakaiku 8, Lizarraga 6, Etxarren 5, Irañeta, 4, Unanu 4, Ihabar 2, Hiriberri Arakil 1, Dorrao 1 eta Lizarragabengoa 1.

### Txertaketak

Atzo eta gaur Altsasuko Burunda frontoia txertaketa gune bihurtu da atzera ere. 60 eta 65 urte bitarteko altsasuar, olaztiar eta ziordiarrek hara deitua izan ziren txertoa jartzera atzo. Guztira 758 eta Astrazeneca txertoa jaso zuten. Gaur, berriz, 70 eta 79 urte artekoen txanda da. 780 hitzordu banatu dituzte eta guztiek Pfizer txertoa jasoko dute.

Gainera, osasun arrisku handia duten pertsona batzuk ere deitu dituzte txertaketa gunetik pasatzera. Bestetik, arrazoi bat edo bestea dela zegokienean txertoa jasotzerik izan ez zuten hainbat sakandarrek ere jaso zuten asteartean, Etxarri Aranazko eta Altsasuko osasun etxeetan.

### Perimetro itxierak

COVID-19 gaitzaren hedapena mugatzeko, Arbizuko, Etxarri Aranazko eta Lizarragabengoa-ko perimetro itxiera indarrean jarri zuen apirilaren 15ean. Gauerdian bukatzekoa zen, baina heldu den ostegun gauerdia arte luzatu dute. Osasunbideko ardura-dunek azaldu dutenez, "bi udalerritan ohiz kanpoko neurriei esker, kutsadura eta positibotasun indize handiak jaitsi badira ere, eta haien goranzko joera murriztu bada ere, Osasun Departamentuak, horietako bakoitzaren osasun txostenak eta txosten epidemiologikoak aztertu ondoren, beharrezkotzat jotzen du udalerririk horietako perimetro itxiera beste astebetetz luzatzea, birusari eusteko".

Arbizuko Udalak arbizuarrei gogorarazi die gaitzari aurre egiteko eraginkorrak diren neurriak badaudela: eskuak maiz garbitzea; musukoa ondo jantzi ta erabiltzea; toki itxiak ahalik eta gehienetan aireztatzea eta jende multzo handiak toki itxietan ez biltzea. Gainera, positibo batekin harremana izan bada norbera isolatu eta frogatu egin behar da.



# Langileen eskubideak aldarrikatzeko eguna

Maiatzaren Lehena, Langileen Nazioarteko Eguna, sindikatuak beraien aldarrikapenak kalera aterako dituzte bihar. Osasun neurriak betez eginen dira manifestazioak, aurreko urteetako ohiko irudietatik guztiz bestelakoak utziko dituzte

## SAKANA

1886ako maiatzaren 1ean Chicagoko anarkista batzuk zortzi orduko lanaldiaren aldeko greba hasi zuten. Protestaldiko bost kide heriotza zigorrera kondenatu zituzten. Chicagoko martiriaren omenez ospatzen da Maiatzaren lehena.

## LAB

Sakanan mobilizazioak deitu dituen bakarra da LAB: Altsasun, 18:00etan, Nettotik abiatuko da LABen manifestazioa. Perimetro itxieragatik Arbizun, 12:30etan plazan, eta Etxarri Aranatzen, 19:00etan, plazan kontzentrazioak eginen dira.

LABek *Aldaketa da aukera!* leloa aukeratu du. Sindikatutik esan dutenez, "elite ekonomikoek eta politikoez beti irabazten duten logika horretaz nekatuta eta nazkatuta gaude. Norabide aldaketa defendatzen dugu, trantsizio ekosozialista eta feminista; garapen paradigma berri bat, demokratikoagoa". Sindikatuko kideen iritziz, "norabide aldaketa, trantsizioa, eredu ekonomiko eta sozial berri bat eraikitzea, mundu mailako erronka bat da". Hala ere, "alternatiba hori herrialde bakoitzetik bultzatu behar da. Euskal Herrian, Nafarroan, ezkerretik gidatu



Langileen mobilizazio bat. ARTXIBOA

behar da, langileen parte hartzearekin eta herri burujabetza prozesuan sakonduz". Horrela egiten ez bada norabide aldaketarik ez dela egonen ziurtatu dute LABetik.

## ELA

Iruñean, 11:30ean, Gurutze plazatik abiatuko da ELAren manifestazioa. ELAkoen martxak bat eginen duena garbiketa sektoreko langileek eta egoitzetako langileek Merindade plazan eta Behe Nafarroa eta Paulino Caballero kaleen bidegurutzean

11:30ean eginen dituzten kontzentrazioekin.

Maiatzaren Lehenerako ELAK *Aldaketa garaia da* leloa aukeratu du. "Baina aldaketa horiek egi bihurtzeko presioa egiten jarraitu behar dugu: bai kalean, bai lantokietan", gaineratu dute sindikatutik. Biharkoan ELAK aldaketa aldarrikatuko du lan erreformaren indargabetzea eta zerga sistemaren erreforma ardatz hartuta. Izan ere, sindikatuan uste dute pentsio publikoen alde egiteko eta lan erreforma indargabetzeko garaia dela, bai

ta lan hitzarmenak bertan negoziatzeko aukera izatekoa ere, horrela, enplegua suntsitu ordez salbatu dadin.

ELAko kideek azaldu dutenez, "pandemiak inoiz baino agerigoan utzi du eraldaketarako premia, milaka lagun osasuna eta ekonomia egoera mehatxupean baitago, bereziki, emakumeena, eta gizarte desberdintasunak areagotzeko bidean dira". Horregatik, "zirt edo zart egiteko garaia da. Datozen aste eta hilabeteetan hartuko diren erabakiek markatuko dute krisialdiari zer nolako irteera emanen zaion".

## CCOO eta UGT

Bihar, 12:00etan, Iruñeko Merindade plazatik abiatuko da bi sindikatuen manifestazioa. CCOO eta UGT sindikatuak mobilizatzeko deia egin diote Nafarroako gizarteari eta, horretarako, *Orain betetzea tokatzen da* leloa duen manifestazioa antolatu dute. Sindikatuetatik argudiatu dutenez, "Nafarroak zorra du bere langileriarekin; horregatik, orain politika arrerakoiak egin behar dira, orain enplegua bete eta babestu behar da". Espainiako Gobernuari legegintzaldi hasieran hartutako "konpromisoak" betetzeko eskatuko diote kalean, besteak beste, lan erreforma bertan behera uzteko, Lanbide arteko Gutxieneko Soldata (LGS) igotzeko eta pentsioen erreforma ere bertan behera uzteko eskatu diote.

Nafarroako Gobernuari ere aipamenak egin dizkiote sindikatuek, besteak beste, Europako berrindartze funtsak aprobetxa ditzala eskatzeko, "itzulkin sozial iraunkorra" izan dezaten. Bi sindikatuek gobernuari eta patronalari akordioetarako duten

prestutasuna adierazi diete. Haien hitzetan, "Nafarroako eta Espainiako Gobernuak eta patronalak badakite bi sindikatuok eskua luzatuta daukagula ezinbesteko akordioak lortzeko", baina ez diote hartutako konpromisoak betetzea eskatzeari uko egingo.

## Esk, Steilas, CGT

Iruñeko Errekoleta plazatik, 12:00etan, abiatuko da Esk, Steilas, CGT sindikatuak manifestazioa, *Bizitza duinaren alde, lanen eta aberastasunaren banaketa* leloa duena. Esk, Steilas, CGT kideek azaldu dutenez, "urtebete geroago haien normaltasunarekin nazkatuta gaudela esanen dugu bihar". Horrekin batera, adieraziko dute, "normalena, bizitzek haien onurak baino gehiago balio behar dutela, gaitozen lekutik gaitozela ere, gureta tokia duen sistema bat nahi dugu". Hiru sindikatuak nabarmendu dutenez, "gureta ez dago berreraikuntza ekonomikorik berreraikuntza sozialik gabe, gureta ez dago krisirako irtenbiderik eskubideetan aurrera egin gabe". Horregatik, haiekin bat egitera gonbidatu dituzte herritarak.

## CNT

Tafallako Foru plazatik, 11:30ean, abiatuko da CNTren manifestazioa eta "ekintza zuzeneko sindikalismoa" aldarrikatuko du *Sindikalismo gehiago, duintasun gehiago* leloa duen manifestazioan.

**22 KOLEKTIBOK  
M1 SOZIALA  
MANIFESTAZIOA  
ANTOLATU DUTE  
IRUÑEAN, 17:30EAN**



107.3 FM

# beleixe

**ZUZENEAN 10:00-12:00**  
ERREPIKAPENAK 14:00ETAN

**ONLINE ENTZUTEKO**  
GUAIXE.EUS



# BILTOKI

TABERNA • JATETKEA

Plater, konbinatuak eta bokatak terrazan  
Eguneko menuak enkarguz

**Eguneko menua 11€**  
**Menu berezia 15€**  
Jangela terrazetan

**Telefono berria:**  
948 562 348 • Altsasu



**kaxeta**  
LIBURUDENDA



**Izan zaitez ura laguna**

fotokopia@kaxeta.net  
628 542 519 | 948 460 477

# "Behar soziala oinarri duen gizartea sortzeko"

**IDOIA TORRENTE ARMENTIA ETA UNAI OTERMIN BENITO**

KONTSEILU SOZIALISTA SAKANAKO KIDEAK

Krisi testuinguruan eta pandemia betean, badira hilabete batzuk Sakanan eragile berri bat dagoena, Kontseilu Sozialista. Bere kideek dituzten asmoak azaldu dituzte

**Alfredo Alvaro Igoa** SAKANA

Kontseilu Sozialista Sakanako kide Idoia Torrente Armentia eta Unai Otermin Benitok erakundearen sorreraren eta helburuen berri eman digute, Langileen Egunaren bezperan.

**Zergatik sortu duzue Kontseilu Sozialista Sakanan?**

Antolakuntza lurraldean hedatzeko helburuarekin sortu genuen. Langile klasea babesgabe dagoen esparruetan lan egiteko eta belaunaldi zein sektore ezberdinei borrokarako lekua irekitzeko. Horrela, pixkanaka langileriaren gaitasun propioak areagotzeko asmoz eskualdean gure alea jartzeko.

**Zergatik sozialismoa?**

Kapitalismoa etekin ekonomikoak determinatzen du, hau da, bizitzako esparru guztiak (hezkuntza, osasungintza, harremanak...) diruaren eraginak zeharkatzen ditu. Diruaren, ekoizpen bideen... jabe burgesia da eta, beraz, berea da ere botere politiko eta soziala gaur egun. Langileria, haiendako lan egitera behartuta gaude kapitalismoan, teknologia eta produktibitatea gorantz joan arren, gero eta baldintza ziurgabeagoetan gainera krisi testuinguru honetan.

Sozialismoa guretzako ez da aberastasanaren banaketa soil



Idoia Torrente Armentia eta Unai Otermin Benito Kontseilu Sozialista Sakanako kideak.

bat. Ez da langileok burgesiaren-dako ekoiztu dugun aberastasanaren banaketa justuago bat, baizik eta errealitate sozial oso bat, prozesu baten bidez eraiki behar dena, non etekin ekonomiko ez dagoen oinarrian, interes kolektiboa baizik.

Askatasun politikoen handipenaren prozesu bezala ulertu dezakegu sozialismoa, non hainbeste aurreratu dugun ze lurraldearen gaineko kontrol jakin bat dagoen jada. Hortik gure helburu estrategikoa Euskal Estatu

Sozialista, langileriak langileria izateari utziko dion eta askatasunerako baldintzak ezartzera bidean.

**Eta sozialismo gisa zer ulertzen duzue?**

Esan bezala, kapitalismoarekiko osotara ezberdin izango den oinarri ekonomiko bat duen gizartea antolatzeko forma bat da guretzako sozialismoa. Behar soziala oinarri duen gizarte hori egikaritzeko ezinbestekoa da langileriaren antolakuntza progresiboki garatzen joatea, izan

ere, geroz eta gaitasun gehiago izango dituen antolakuntza hori da sozialismoaren enbrioia eta bermea.

**Sozialismoa aldarrikatzen duten beste antolakunde batzuk badaude. Erakunde berria zergatik eta zertarako?**

Lehenik eta behin, errespetu eta ohorea gure Euskal Herri txikia eta mundu hau hobetzeko lanean egon diren eta lanean dauden guztiak. Ez gaude hemen besteak baino gehiago garelako esateko. Gure ustez, 1970. hamarkadatik aurrera mendebaldean eta Euskal Herrian bereziki pare bat hamarkada geroago, sozialismoa aldarrikatzen duten antolakunde horiek folklorera mugatu eta sozialismoaren ulerkera desitxuratzen dute. Batez ere jardun politikoa instituzioetara mugatzen dute, itxura erradikala mantendu badezakete ere zenbaitetan.

Beste eragile batzuk, nahiz eta instituzioetara ez mugatu eta forma erradikalekin jardun, ez dute langileriaren antolakuntza independentearen beharra guk bezala ulertzen.

Hala ere, eta esan bezala, mugimendu sozialistatik harago sozialismoaren eraikuntzan jarduten duten antolakunde zein pertsonak daude eta prestutasun osoa dugu gure partetik elkarlanean; guk gure aletxo jarriko dugu.

**Zein da zuen lan esparrua?**

Egun oinarriko beharren esparruan gabilta lanean, GOGORren

**"HORI EGIKARITZEKO EZINBESTEKOA DA LANGILERIAREN ANTOLAKUNTZA GARATZEA"**

bidez, oinarriko produktu eta elikagaiekin. 76 pertsonak jasotzen dute hilero produktuen lotea eta 30 boluntario inguru gabilta lanean.

Indarrak areagotzea dagokigu, arlo honetan zein beste lan esparruetan proletalgoak dituen beharrei erantzunez jarduteko aukera izateko. Helburua ez da bakarrik langileriaren defentsarako antolatzea, guk gaitasun ofentsiboak garatu nahi ditugu, burgesiaren boterea kolpatuko duen antolakuntza elikatuz.

**Zein ekarpen egin nahi diozue ibarrari?**

Sistema kapitalista zikin honek sortzen dituen miseriei erantzun kolektibo bat emateko gaitasuna eraiki, langile klasearen espresio antolatu ezberdinen artean zubiak eraikitzen laguntzea eta borrokarako gaitasunak garatzea.

**Hainbat eskualdeetan sortu dira Kontseilu Sozialistak. Zein harreman duzue?**

Agerikoa den moduan Euskal Herriko hainbat eskualdetan sortu diren Kontseilu Sozialisten artean komunikazio eta koordinazio harremana dago. Hainbatetan lan esparru berdinak lantzen dira eta elkarlanean aukerak hor daude, esaterako, maiatzaren 2an Betelun egingo dugu mahai inguru, non hainbat eskualdek parte hartuko duten.

GOGOR Kontseilu Sozialista Larraunekin batera daramagun dinamika da. Hori dela eta, Maiatzaren Lehenean, elkarlanean jardungo dugu.

**Maiatzaren 1era begira zer mezu zabaldu behar duzue?**

Gure etxeko ateetan dagoen (eta askoren etxea ostikoka bota duen) krisi kapitalistari aurre egiteko, eta harago kapitalismoa gainditzeko langile botere independentea eraikitzea behar-beharrezkoa dela esango dugu. Urte latzak ditugu aurretik Ongizate Estatuaren gainbeherarekin batera miseria orokortzen ari baita langileengan. Langabezia, etxegabetzeak, polizia jazarpena, elikagaia lortzeko gaitasun eza...

Langileriaren askapenaren alde borrokatutakoak gogora ekarri eta sozialismoaren beharra eta gaurkotasa aldarrikatuko dugu. Maiatzaren 1ean, 12:00etan Altsasuko Foru Plazatik abiatuko den manifestazioan parte hartzeko deia luzatzen dugu. Klase batasunaz sozialismoa eraiki!

Konfiantzazko aseguradora orokorra!

**MAPFRE**

MAPFRE La aseguradora global de confianza

JOSE ANTONIO IMAZ PRIM

948 563 354  
jiazpr@mapfre.com  
San Juan 48 · ALTSASU

**PORTUKO**

okidenaja

Altsasu:  
948 563 822 (denda)  
948 467 153 (lantegia)  
Etxarri Aranatz:  
948 460 988



Garbitoki eraikineko igogailua aldatuko du udalak.

## Udalak merkataritza plana egitea onartu du

Hainbat udal eraikinetan hobekuntza lanak egingen ditu udalak aurten, baita kirol azpiegiturretan ere

### ALTSASU

Altsasuko Udalak herriko Merkataritza Erakartzeko eta Antolatzekeo Plana egitea onartu zuen atzo egindako bilkuran. Javier Ollo Martinez alkateak jakinarazi duenez, planak hiru helburu ditu: merkataritzaren egoera diagnostikatzea, jarduketa ildoak garatzea eta jarduketa programa zehatza prestatzea.

Altsasuko Udalak beste hainbat erabaki hartu zituen bilkura berean. Alde batetik, urtero moduan Zelandi eskola publikoan inbertsioak egitea. Zehazki, uda honetan ikastetxe publikoko beheko solairua eta lehen solairua pintatuko ditu udalak. Ohi bezala, Hezkuntza Departamentuari dirulaguntza eskatuko dio lanak egiteko. Udal eraikinetan egingen diren beste lan batzuei buruzko erabakiak hartu zituen udalak. Batetik, Bake Epaitegian, ludotekan eta Gure Etxean berokuntza sistema berrituko da. Bestetik, La Unión jubilatuko eta pentsiodunen elkartean ere konponketak egingen dira. Eta, azkenik, Garbitoki eraikineko igogailua berritu egingen du.

Bestalde, kirol azpiegiturrei dagokionez, udalak erabaki zuen Burunda pilotalekuko kantzari tratamendu berezia ematea. Horrekin batera, udako igerilekuetan sarbidea kontrolatzeko sistema automatikoa jarriko da, eta Dantzaleku kirol gunean bideozaintza sistema jarriko du. Herri lanei dagokienez, Ibarrea industrialdeko saneamendu sarea egiteko lanen hirugarren fasea

eginen da aurten. Eta urtero moduan, hainbat kaletan konponketa txikiak egingen dira. Aldi berean, udalak Obra eta Zerbitzuen Brigadak erabiltzeko lorezaintza lanak egiteko makineria eta atzera egiteko makina erosiiko ditu.

### Desadostasuna

Atabo Altsasu SMk frontoiko eta dantzalekuko tabernak kudeatzeko deialdia egin zuen joan den astean. Altsasuko EH Bilduk jakinarazi duenez, kontrako botoa eman zuen, koalizioa kideen iritziz, "baldintza berriek ezinezko egiten baitute lokal horiek kudeatzen dituztenek duintasunez lan egitea eta soldata duin bat irabaztea".

Altsasuko EH Bildukoek jakinarazi dutenez, "askotan proposatu du Frontón taberna eraberritzea eta lan egiteko instalazio egokiz hornitzea. Frontoiko obra egin zenean planteatu genuen une egokia zela tabernan ere obra egiteko, baina Geroa Baik errefusatu egin zuen". Koaliziotik gaineratu dutenez, "Dantzaleku gunea garbitzeagatik esleipendunari ordaintzetik alokairua kobratzera pasatzea eta kirol jarduerak daudenean aldagelak garbitzera behartzea, ia bermatzen du taberna itxita egonen dela udan". EH Bilduk uste du "ez dagoela plangintzarik eta ez direla balioesten ondorioak. Ez bada, ideia dela inor ez aurkeztea, udarako interesa duen bakarren bati zuzenean esleitzea. Denborak esango du".



Aritzalko basoa errepidea eta autobidea erdibituta. AHTren trazatu posible bat bien azpitik pasako litzateke hegotik iparrera.

# Aritzalko basoa faunarendako zubibidea

Nafarroako Gobernuak Aralar eta Urbasa-Andia abereendako lotzeko autobia gaineko zubibidea egiteko Europako dirulaguntza eskaera egin du. Bi mendien arteko ekologia konektagarritasuna bermatu nahi luke gobernuak

### ETXARRI ARANATZ

Europako Batasunak (EB) Next Generation funtsen barruan React-EU laguntza programa dago. Eta horietara Landa Garapeneko eta Ingurumeneko Departamentuak hiru proiektu aurkeztu ditu, behin-betiko argi berdea jasotzeko zain daudenak.

Aurkeztutako egitasmoetako bat da Sakanako Autobiaren (A-10) eta NA-2410 errepidearen gainera egingen litzatekeen faunarendako pasabide bat. Etxarri Aranatz legoke, Aritzalko hariztian. 100 eta 120 metro arteko luzera luke pasabideak. Abereendako autobia gaineko pasabidearen helburua litzateke Urbasa eta Aralarreko mendilerroen artean existitzen den faunaren barrera fisiko nagusia salbatzea; honek Aritzalko hariztiaren bi eremuak konektatuko litzuzke.

Itziar Gomez Perez kontseilariaren esanetan, "jarduketa honekin kontserbaziorako garrantzi handiko ekologia konektagarritasunaren arazo bat konpondu nahi da Natura 2000 Sarearen eskakizunak betetzeko helburuarekin". Gomezek gaineratu zuenez, "jarduketa hori 2030erako EBren Biodibertsitatearen Estrategiarekin lerrotatzen da eta, gainera, ekonomia berraktibatuko luke,

dimentsio horietako obra publiko batek egin dezakeen heinean". Bere eraikuntza aurrera eramateko 5 milioi euroko finantzaketa bat eskatu du departamentuak.

Sakanako Autobia hesituta Aralar eta Urbasa-Andia arteko mugikortasuna zailtzen die abereei. Bestalde, Nafarroako Gobernuak autobia itxiturak

aldatu egin ditu azken bi urtetan, altuagoak jarritz, ia bi metrokoak eta zulo txikiak sarea jarritz. Etxarren eta Lakuntza artean aldatu du. Eta Abiadura Handiko Trena (AHT) beste hesi bat izanen litzateke. Trazadura posible bat Aritzalko pasa berrian iparraldera egingen luke autobia azpitik "tunel bidez" pasaz.

**M1**  
**Aldaketa da aukera!**  
*Zaintza, lana, pizitza, herria!*

**Arbizu** 12:30ean plazan  
**Altsasu** 18:00etan Netto-tik  
**Etxarri Aranatz** 19:00etan plazan

**LAB**

# "Nekez ikusten dut gauden tokian egotea Tokikom gabe"

**IBAN ARANTZABAL** TOKIKOMEKO LEHENDAKARIA

Joan den ostiralean egin zuen Tokikomek, toki komunikabideen bateraguneak, urteko batzar orokorra. Jone Guenetxeak presidente lekukoa Arantzabali pasa zion

SAKANA

**Tokikomeko presidente berria zaitugu. Zer pentsatu zenuen aukera planteatu zizutenean eta ze asmorekin hartu duzu?**

Animoarekin hartu beharrean zaude kargua, eta halaxe egin dut. Momentu polita da; badago zeregina, eta ilusioz beterikoa ere bada momentua. Mundu aldakor honetan bagabiltza, zelanbait, posizionatzen, eta, alde horretatik, animoekin eta gogotsu nago. Bestalde, administrazio kontseiluan gutako edozein izan zitekeen presidente, egia esan. Kargua hartzen dut administrazio kontseiluaren eta batzar orokorraren ahobatezotasunarekin, eta hori garrantzitsua da. Nahi nuke tren berean jarraitzea Tokikomeko bazkide guztiok, eta ahaleginduko gara horretan. **Kargua egoera nahiko aldrebasean hartu duzu: 2020an COVID-19ak hankaz gora jarri zuen mundua eta 2021 honetan ere gauzak ez dira guztiz egonkortu. Tokikom bera ze puntutan dago une honetan?**

Tokikom enpresa sana da, egonkortua, lantalde txiki baina eraginkor batekin ari dena lanean. Oso jende ona dauka eta talde giroa dago. Hori ez da leku guztietan gertatzen. Badauka bere plan estrategikoa, bere misioa zehaztuta eta adostuta. Denon artean adostutakoak dira, eta horrek ere ematen du indarra. Gainera, badaukagu norabidea ere. Alde horretatik, pozik, egia esan.

2020a katramilatsua izan da. Edozein etxetarako izan den legetxe, bada, guretzako ere bai. Tokikom osatzen duten bazkide guztientzako eta, bereziki, hedabideendako. **Tokiko informazioaren kontsumoa izugarri igo zen iaz. Hor daude datuak. Baina, era berean, krisi ekonomikoaren ondorioak, publizitate sarrearen jaitsierak... horrek guztiak ere izan zuen eragina tokiko komunikabideen jardunean. Nola eragin zien 2020ak Tokikom osatzen duten komunikabideei?**

Eragin zuzena izan zuen. Batetik, poza eragin zuen. Ze bazen informazioa emateko garai bat, kazetaritza egiteko garai bat, eta horrek balio du baita profesionalendako ere. Ze, jartzen zaitu leku batean, non jendeak ikusi, entzun eta irakurri nahi zaituen. Gure webguneetako bisitak, orokorrean, Tokikomeko guztiak hartuta, %46 igo ziren. Jendea informazioaren gosez zegoen. Ez bakarrik Txinan zer gertatzen zen jakiteko, baizik eta norbere herrian zer gertatzen den jakiteko. Hori eman du Tokikom: hainbat daturekin, grafikoekin... eta, gainera, egunero-egunero berrituta, izan aste barru edo izan aste akabera. Eta

**"EGITEKO BAT DUGU: INFORMAZIOA BEHAR BAT DA, EZ ESKUBIDEA BAKARRIK"**

horrek lagundu du webguneetako bisiten igoeran. Hori da alde gozoa: egiten duzun horri jasotzaileak erantzuna ematen diolako. Baina badauka gazitik ere: hori egitea kostatu zaigu %30 gehiago, batez beste. Kazetaritza gastu handiagoarekin egin dugu. Eta hori pisutsua da. Eskatzen du lan gehiago. Zer ez genuen egiten grabazio bat egiteko! Pandemia horrek, hasieran oso ezezaguna zenak, sortu zuen demaseko denbora galera lan egiteko orduan. Gainera, gure kasuan, bazegoen beste kontu bat: hedabideok ezinbestekotzat izendatzen gintuzten, premia biziko ondasun. Bagenuen egiteko bat eta badaukagu: informazioa behar bat da, ez eskubidea bakarrik.

**Horrelako egoera batean, Tokikom bezalako talde batek nola lagun diezaike bere barnean hartzen dituen kideei?**

Ezinbestekoa izan da. Tokikom osatzen dugun hedabideetan denetarik dago, eta, denok gauza bera oinarri ezberdinetatik egiten hasiko bagina, askoz gehiago zailduko litzateke bakoitzaren egitekoa. Toki hedabideetako profesionalak egin duten lana ez dakit bikoitza izan den, baina askoz handiagoa izan dela eta malgutasun hori erakutsi dutela bai. Goienan eta beste edozein hedabidetan berdin, izan txikia goa edo handiagoa. Tokikom ekarri du bateratze bat. Pandemiaren datu bilketarekin azal-



Goiena Komunikazio Taldeko zuzendari nagusi Iban Arantzabal da Tokikomeko, euskarazko toki ko-

duta, esaterako: datuak jaso, azkar webgeneratu eta konparatu ditugu; herriekin, gure ondoko bailarekin, Hego Euskal Herriarekin, ahal zenean Euskal Herriarekin... eta mapa bat osatu dugu. Gure kasuan, gertuko mapa bat osatzea. Horrek du benetan garrantzia, gertuko datu horrek. Zure herriko datu horrek, baina ez irla bat moduan, Euskal Herria subjektu moduan hartuta. Tokikom marrazten du Euskal Herria eta laguntzen du, erremintekin, datuen kudeaketarekin, informazioarekin... hainbat modutara. Gaur egun oso nekez ikusten dut gauden tokian egotea toki hedabideok Tokikom ez balego.

**Bakoitza bere aldetik joanda...**

Bai, bikoitza kostatuko litzaziguke. Debagoienean, Soraluzen, Elgoibarren, Beran, Zumaian, Durangon... edonon, oinarria bat izateak asko laguntzen digu, eta hori Tokikomi esker lortzen da. Batuta, askoz eta efikazia eta efizientzia handiagoarekin egiten dugu kazetaritza.

**Tokikomeko kideak aipatu ditugu, eta ostiraleko batzar orokorraren ostean bi kide gehiago ditu: 'Tolosaldeko Ataria' eta Bizkaiko Arra-**

**tia bailarako 'Begitu' hamabostekaria. Berri ona, ezta?**

Oso ona, besteak beste, erakusten duela jendeak nahi duela egon Tokikomen. Zuzeneko harreman horrek berezko garrantzia duela eta ekarri handia egiten diolako hedabideari. **Tolosaldeko Ataria** bera Tokikom garatutako plataformarekin ari zen lanean aspalditik, eta orain eman du salto bazkide izatera. Plataformaz gain, papereko edizio sistema baterako aukera dagoelako, telebista egiteko modua dagoelako, kudeaketa aurreratuan sartu daitekeelako gainontzekoekin batera eta gainontzekoengandik ikasi, berak erakutsi... Berezkoa du Tokikom ekarri hori, uste dudalako eman ere asko egiten duela. Etorriko dira hedabide gehiago ere, Tokikom beharrezkoa da tokiko hedabideendako.

**Zer azpimarratuko zenuke Jone Guenetxeak lau urte hauetan egin duen lanari buruz?**

Jakin du Bizkaian ere eragiten, Tokikomen bitartez. Eta topatu ditu aliantzak erakundeetan. Lehen baino batuago daude, lehen baino hobeto egiten da lan. Ez bakarrik Bizkaian. Jonek oso ondo ordezkatu gaitu gainontze-



munikabideen bateraguneko presidente berria. WWW.GOIENA.EUS

ko erakundeekin ere: Jaurleri-tzarekin, Nafarroako Gobernua-rekin, eta abarrekin. Datuek argi erakusten dute aurrera egin dela. Orain, kazetaritzara bildu nahi ditu indarrak, eta seguru eman-gu dituela hor ere fruituak. Horratx *Anboto*-k atera duen elkar-rrizketa Sarrionandiarekin, edo *Jantzari* dokumentala.

**Zeintzuk dira Tokikomek, bai barrura begira eta baita kanpora begira ere, dituen erronka edo egin-behar nagusiak?**

Uste dut barrura begirako egin-beharreko lan handi bat eginda dagoela, adostu direlako hainbat gauza, lehen esan dudan moduan, baina oraindik ere geratuko zaigu, eta denoi dagokigu, gainera, kohesio hori. Hedabide txikietik handienara. Nik uste dut hor badagoela lanerako esparru handi bat. Elkarrizketa eman diezaiokegu eta elkarrengandik gehiago jaso dezakegu. Uste dut hor asmatzen badugu are eta hobeto joango direla urte hau eta hurrengoak ere.

**Kanpora begira?**

Markan ere eragin beharko dugu oraindik. Sinesgarritasunean pauso handiak ematen ari gara. Kanpora begira batuta agertzea

ere uste dut tokatuko zaigula talde moduan, eta hainbat informazio ematea talde horretatik abiatuta ere. Adibide gertuko bat daukagu Sarrionandiarenarekin. *Anboto*-k lortu du eskusiba hori. Ondo egindako lan bati esker eta lortutako konfiantzari esker elkar-rrizketatuarekin. Elkarrizketa hori berori tokiko guztietan batera zabaltzea, seguruenik, irabazteko dagoen kontuetako bat da. Batera zabaltzeko modukoak izan daitezke Euskal Herriko edozein artistaren edo kanpotik datorren dena delako elkarrizketak. Pentsatzen dut horrelako pausoak ere ematen hasiko garela, ze tokiko aldizkaria, telebista edo webgunea ez da bakarrik toki horretakoa. Gertuko guretzako gaur egun da *Goazen!*-eko aktore bat, edo EITB-ko informatiboetako aurkezlea edo kirolari ezagun bat. Ez da tokikoa, baina bai gertuko, eta hori da interesatzen zaiguna.

**"ELKARRI GEHIAGO EMAN DIEZAIKEGU ETA ELKARRENGANDIK GEHIAGO JASO DEZAKEGU"**

**Etxebarri zure blogean, hedabideei begira etorkizunerako hainbat gako ematen dituzu. Aipatzen dituzu, besteak beste, harpidetza digitala, inteligentzia artifizialaren erabilera, sare sozial handien aurrean hedabideek izan behar duten egin-kizuna... Horiek ikusten dituzu gako nabarmen moduan?**

Bai, eta ez da nik bakarrik ikusten dudala. Mundu mailako 300 bat profesionali egindako galdeketa baten ostean ateratako ondorioak dira. *New York Times*, *Telegraph*, *Financial Times*, *The Guardian*... halako hedabide handietan, berez guretzako haiengana heltzeko zail izango liratekeen horietan agertzen diren hausnarketak dira. *BBCk* egindako inkesta baten dago oinarrituta. Han aipatzen da inteligentzia artifiziala. Berez, tokiko hedabide batendako urrun geratu daitezkeen hori gerturatzen digu Tokikomek. Adimen artifizialaz, ez bakarrik hitz egiteko; izan ere, dagoeneko bagoaz hiru urte lanean adimen artifiziala oinarri duen proiektuan, eta horrek emango ditu fruituak 2021ean ez bada 2022an. Elkarrizketa hau berau transkribatu ahal izango da testua makina batek eginda, eta ez kazetari baten bitartez. Horrek ere

lagunduko digu kazetari hori are eta garrantzitsuagoak diren gauzetan inplikatzeko. Ze makinak egin lezakeena egiten egotea... Kazetariak behar du are kazetariago izan eta kazetaritzari are eta balio handiagoa eman. Nik uste dut horiek erronketako batzuk direla. Horrekin lotuta, negozio moduan begiratu beharko dugula, nola publikitate jaisten ari den eta nola harpidetza digitalei garrantzia eman beharko diegun... Hainbat gauza dira inkesta horietan agertzen direnak eta guretzako iparra direnak. Egon behar dugu antena horrekin ere, munduan zer mugitzen den ikusteko eta, moldatuta, gurera ekarri.

**Horrek lagunduko du kazetaritza egiten edo kazetaritza gehiago egiten?**

Ez daukat zalantzarik, ze denbora aterako dugu hortik. Gauzak ondo antolatu eta hobetuta ere, beti geratuko da kazetaria eta kazetariaren egiteko garrantzitsu hori. Eta kazetariaren egiteko garrantzitsua eta sinesgarria izango da istorio horiek ondo kontatzen baditugu, onak badira eta erakargarriak badira. Sinesgarri izateak ere garrantzi handia dauka. *BBCk* egindako galdeketa horretan, %83k aipatzen zuten inpartzialtasuna izango dela garrantzitsua. Zertarako? Sinesgarritasuna lortzeko. Hau da kontzeptu bat oraindik garatu behar duguna gure artean, ze inpartziala izanda izango da hobe istorioa edota informazioa. Irakurleari emango diogu hitza berak erabakitzeke zer den berezako egia eta zer ez. Egia-aren bila joatea badagokigu, badagokigu objektiboa den horren bila joatea, baina, askotan, hori baino garrantzitsuagoa da testuinguru guztia marraztea eta irakurleak tontotatuz ez hartzea. Ez dut sinisten jendeak zer pentsatu behar duen esaten duten hedabideetan.

**Tokikom, nolabait esateko, gizartearen ekosistema baten parte da, hainbat alde dituena, eta erakunde publikoak daude hor. Herritarrak ere badaude hor, eta gainerako hedabideak ere badaude hor; esaterako, Tokikom bera parte den**

**"KAZETARIAK BEHAR DU ARE KAZETARIAGO IZAN, KAZETARITZARI ARE ETA BALIO HANDIAGOA EMAN"**

**euskarazko hedabide ez publikoen elkarte, Hekimen. Ze harreman dago hiru horien artean?**

Herri Ekimeneko Hekimen elkartearen parte da Tokikom. Bazkide bat gehiago da. Sortzailetakoa. Bigarren aipatu duzu: administrazio publikoa. Goienan ohituak gaude erakunde publikoekin batera jarduten. Sorreatik bertatik jabekide dituelako Debagoieneko Udalak. Baina ez da ohikoena izaten hedabide batean hala izatea. Jabekide ez izanda ere, uste dut harremanak goxatu egin behar direla. Bide horretan, administrazioak ere eman ditu pausoak. Hekimenek eman ditu pausoak eta guk, gure aldetik ere, gutako bakoitzak eman ditu pausoak. Igarriko da. **Askotan lotzen da administrazioa finantzaketa iturri soil moduan, baina hori baino gehiago planteatzen du Tokikomek?**

Oraindik ere heldu behar dugu estadio horretara, ze askotan diruaz bakarrik hitz egiten dugu. Uste dut gauza gehiago ere adostu beharra dugula. Esaterako, daudenetik abiatu eta tokiko hedabide masiboagoak behar dituzte Bilboko euskaldunek? Adostu dezagun benetan behar den edo ez. Edo gazteendako beren beregi bestelako zerbait behar du egoerak? Edo kiroletako agerkiaren bat behar da? Uste dut euskararen sustapenaren ikuspuntutik elkarlan horrek emango dituela fruituak, eta, gainera, zenbat eta zintzoagoa eta garde-nagoa izan elkarlan hori, seguru-ruenik, orduan eta fruitu gehiago emango ditu.

**Bukatzeke, azken lerroa: herritarrak, Tokikomeko hedabideen kontsumitzaileak direnak.**

Eta inportanteena. Gu zero kilometroko hedabideak gara, eta ez herritarrendako bakarrik, herritarrekin egin behar ditugu hedabideak. Hor badaukagu zer ikasi. Komunitatea askotan aipatzen da, baina ez dago oso zehatz definituta, ezta, komunitatearen parte izanik, zer egin behar dugun ere. Oraindik definitzeko eta ikasteko daukagu. Honetan estropezu ere egin beharko dugu. Baina planteatu behar dugu komunitategintza bateratua izan dadin, gure herritako komertzioekin, gure herritarrekin, gure hedabideekin... Ze tokiko hedabide bat, zer da komertzio txiki bat baino. Gu bat gehiago gara. Sinisten dut, gainera, batera egin beharko ditugula gauzak.

## AGENDA

EMAIGUZUE ZUEN EKITALDIEN BERRI ASTEAZKENEN EGURDIA BAINO LEHEN. Tel.: 948 56 42 75 / kultura@guaixe.eus

## OSTIRALA 30

**ARBIZU** Kutxa Birari harrera prestatzeko bilera irekia.  
18:00etan, udaletxeko batzar gelan.

**ALTSASU** Gazte agenda: Sexgunea.  
17:30etan, Intxostiapunta gazte gunea.

**ALTSASU** Oholtzara salto: Dantzaz taldearen, eta Andra Mari ikastolako DBH 3. mailako

eta Altsasu BHiko DBH 2. mailako ikasleen **Basoa dantza** emanaldia.

18:00etan, Zelandi kiroldegian.

**IRURTZUN** **Zapla!** Nafarroako bertso plaza martxan bertso saioa: Iker Gorosterrazu, Irati Majuelo eta Sustrai Colina.  
Gai jartzailea: Maialen Belarra.  
18:30etan, kultur etxean.

**ALTSASU** **Irakurri-zabalduborrokatu.** Gazteentzako lan eskubideen gida.  
LABeko eta Ernaiko kideekin.

18:00etan, gaztetxean.

**OLAZTI** Irakurle kluba Siri Hustvedt idazlearen **Todo cuanto amé** liburuari buruz ariko da.  
20:00etan, liburutegian.

**ETXARRI ARANATZ** **Alde hemendik. Herriyek zeintzen dau herriye! Ez txakurrek!** Etxarriko Gazte Asanbladak antolatutako kontzentrazioa.  
20:30etan, plazan.

## LARUNBATA 1

**ALTSASU M1.** **Klase batasunaz, sozialismoa eraiki** Gogor eta Kontseilu Sozialistaren manifestazioa.  
12:00etan, Foru plazatik.

**ARBIZU M1.** **Aldaketa da aukera! Zaintza, lana, bizitza, herria!** LABen manifestazioa.  
12:30etan, plazan.

**LAKUNTZA** **Izan bidea** elkartasun erronka: hiru taldeen arteko lasterketa.  
17:00etan, plazan.

**ALTSASU M1.** **Aldaketa da aukera! Zaintza, lana, bizitza, herria!** LABen manifestazioa.  
18:00etan, suhiltzaileen paretik.

**ETXARRI ARANATZ M1.** **Aldaketa**

**da aukera! Zaintza, lana, bizitza, herri!** LABen elkarretaratzea.  
19:00etan, plazan.

## IGANDEA 2

**IRURTZUN** **Dardara** dokumentalaren emanaldia.  
Sarrera: 5 euro.  
20:00etan, kultur etxean.

**ALTSASU** **Euskal Presoak Euskal Herrira** elkarretaratzea.  
20:00etan, plazan.

## ASTELEHENA 3

**ALTSASU** **Pentsio duinen aldeko** kontzentrazioa.  
12:00etan, Zumalakarregi plazan.

## ZINEMA

## ALTSASU

IORTIA KULTUR GUNEKO ARETO NAGUSIAN

**Nomadland** gaurkotasunezko filmaren emanaldia  
Ostirala 30: 19:00  
Igandea 2: 19:30

**Otra ronda** gaurkotasunezko filmaren emanaldia  
Osteguna 6: 19:00

## ASTEAZKENA 5

**IRURTZUN** **Hitzaldia: Gure Gora Beherak – Hileroko zikloa** (gazelaniaz).

Hizlaria: Maite Aranburu emagina.  
Adin guztiei zuzenduta. Izen ematea: kultur etxean.  
Antolatzaileak: Osasun etxea eta udala.  
17:00etan, kultur etxean.

# Bazkide Zozketa

## OTSAILEKO SARIAK

## 1. SARIA

Eduardo Uharte Uharte (Hiriberri Arakil)

## 2. eta 3. SARIAK

San Donato Ikastetxe publikoa (Etxarri Aranatz)  
Patxi Osinaga Labaien (Irurtzun)  
Martina Navarro Osteriz (Ziordia)



## ZORION AGURRAK




Arhane  
Laster 4 urte beteko dituzu, zorionak familia guztiaren partez!




## EGURALDIA ASTEBURUAN


Ostirala, 30




Larunbata, 1



Igandea, 2



Astelehena, 3



- Leihoen, ateen eta kontraleihoen fabrikazio eta muntaketa
- Balkoien eta terrazen itxitura
- Kolore guztietako mallorkinak
- Konpromezurik gabeko aurrekontua

info@dekovennavarra.com - www.dekovennavarra.com  
Ibarrera industrialdea, 9 pabiloia - ALTSASU - Tel./Faxa: 948 468 360 - Telefono mugikarra: 690 641 860



**ESKELAK JARTZEKO: 948 56 42 75**

edo eskelak@guaixe.eus

- ▶ Eskelen tarifak: 50,82 € / 96,80€ / 130,68 € prezio hauek BEZa barne dute.
- ▶ Bazkideek % 10eko deskontua dute.
- ▶ Eskelak jasotzeko azken eguna: Osteguna goizeko 11:00k baino lehen.

**JAIOTZAK**• **Ihintza Urritza Jungitu**, apirilaren 17an Bakaikun**EZKONTZAK**• **Maria Angeles Ruiz Luque eta Francisco Caravaca Gomez**, apirilaren 24an Lakuntzan**HERIOTZAK**• **Simon Razkin Leiza**, apirilaren 24an ArbizunINFORMAZIO HAU EPAITEGIETAN ETA UDALETAN JASOTZEN DA.  
AGERTU NAHI EZ DUENAK, HAN JAKINARAZI DEZALA.

## ESKELA

**Antxon Zabalza Akerreta**

Agur esango nizueke baina...  
"nire erlijioak ez dit uzten"

## OROIGARRIA

**Adur Mariñelarena Galartza**

XVI. urteurrena

Maitasuna bizitza da eta maite duenak ez du inoiz ahazten  
Zu gure baitan biziko zara betiko

**Etxekoak**

Etxarri Aranzat

**IRAGARKI SAILKATUAK****LANA/NEGOZIOAK**

## BEKA

**UEMAK Iñaki Arregi ikerketa bekaren II. deialdia zabaldu du:** Udalerri euskaldunen garapenarekin ez ezik, soziolinguistika edukiak zabaltzarekin eta udalerri euskaldunei buruzko ikerketarekin lotura estua izango du beka. Norbanakoek edota ikerketa egiteko berariak sortutako lantaldeek jaso ahal izango dute. Laguntza jaso nahi duten egitasmoek, proposamenak eta lehen laginak aurkezteko epea maiatzaren 28an amaituko da. Epamahaiak ekainaren 30ean jakinaraziko du 6.000 euroekin saritutako bi ikerlanak zein izango diren. Saridunek hamar hilabeteko epea izango dute laginak garatzeko eta ikerlanak aurkez-

teko. Amaitean, gutxienez 75 eta gehienez 200 orrialde izan beharko dituzte saritutako lanek. Dokumentazioa UEMAren Azpeitiko bulegoan (Enparantza nagusia, 11, 6.bulegoa. 20730 Azpeitia, Gipuzkoa), digitalki [administrazioa@uema.eus](mailto:administrazioa@uema.eus) helbidean. Informazio gehiago [www.uema.eus](http://www.uema.eus) webgunean.

## LAN ESKAINTZA

**Irurtzungo Pikuxar Elkartea taberna berrirako sukaldari bila:** Interea baduzu bidali zure [Cva.pikutaberna@gmail.com](mailto:Cva.pikutaberna@gmail.com) helbidera. Astean 12 orduko lanaldia da, txandaka. Beharrezkoak dira jarrera proaktiboa eta lanean autonomia edukitzea, bestalde, euskara jakitea eta sukaldaritzan esperientzia izatea baloratuko dira.

**HIGIEZINAK**

## SALGAU

**Etxarri Aranzaten, Enfermogurute demioan, 8500m<sup>2</sup>-ko lursaila salgai:** guztiz hesituta dago eta 8 metro eta erdiko sakonera duen putzua du. Deitu 669 809 955 tfnora.

**LEHIAKETAK**

**Liburuaren eguneko tribialaren irabazlea:** Sakanako literaturaren inguruko hamar galdera erantzutea zen GUAIXEK proposatzen zuen erronka. Liburuaren egunaren tribialaren lehenengo edizioa antolatzen gurean, apirilaren 23an Liburuaren nazioarteko eguna zela baliatuz. Maddalen Goñi mutiloarrak hamar galderak erantzun zituen ongi, eta horregatik Liburuaren eguneko tribialaren lehenengo edizioaren

irabazlea da. Errigorako saskia eta Guaixe25 boltsa irabazi ditu. Zorionak!

**XII. Gaztezulo Bideo Lehiaketa martxan:** [www.gaztezulo.eus](http://www.gaztezulo.eus) helbidean sartu, formularioa bete, bideoa grabatu (ezinbestean Gaztezulo paperezko aldizkaria, aldirikari digitala edota gaztezulo.eus webgunea azaldu behar dira) eta bidali [web@gaztezulo.eus](mailto:web@gaztezulo.eus) helbidera maiatzaren 21a baino lehen. Irabazleek 1200 euroko saria jasoko dute! Informazio gehiago <https://www.gaztezulo.eus/albisteak/hemen-daxii-gaztezulo-bideo-lehiaketa/> estekan.

**OHARRAK**

**Olatziko irakurle taldea:** Siri Hustvedt-en *Todo cuanto amé* eleberriaren inguruko solasaldia gaur,

ostirala, 20:00etan Olaztiko liburutegian.

**Aroztegiako akanpadarako deia:** Baztan Aroztegi hirigintza proiektua apirilaren 16an hasi zen. Haren bidez egitasmoari erresistentzia egiten ari dira. Borroka gogor eta luzea aurrekusi dute eta, horregatik, Euskal Herri osoko herri mugimenduen babesa behar-beharrezkoa jo dute. Eragileei babesa eta inplikazioa adierazteko eskatu diete. Bestalde, akanpadan parte hartu nahi dutenek ere aukera dute. Horretarako, [aroztegiagelditukodugu@ni.eus](mailto:aroztegiagelditukodugu@ni.eus) helbidera mezua idatzi behar da, zein egunetan joan nahi den zehaztuz eta gaua han pasa behar duen ere. **'Kubarako xiringak' kanpaina:** Euskadi-Kuba

Gobernuz Kanpoko Erakundeak kontu korronte bat zabaldu du diru ekarpenak jaso eta Kubara eramateko xiringak erosteko helburuarekin. Kubak, beraien txerto propioekin biztanleria osoa immunizatu nahi du aurrean, baina, EEBK ezarritako blokeoak materiala erostea oztopatzen du. *Blokeoek hil egiten dute, zure elkartasunak Bizia ematen du.* Ekarpentek egiteko kontu korrontea: ES35 3035 0134 4313 4005 9271.

**Mikel Arregiri buruzko liburua honako tokietan erosi daiteke:** Lakuntzan Ogi berrin, Aliproxen eta Estankoen; Etxarri Aranzaten Xaxeta liburu denda eta Altsasun Arkatz liburu denda, 15 eurotan.

[iragarki@guaixe.eus](mailto:iragarki@guaixe.eus)  
[www.iragarkilaburraak.eus](http://www.iragarkilaburraak.eus)



IZARRA

HEMEN, ZURE ONDOAN  
AQUI, A TU LADO

«Bizitzan badira une batzuk  
zeinetan norbait  
ondoan behar dugun»

BEILATOKIAK

ALTSASU

Santa Cruz, 6

ETXARRI ARANATZ

Nagusia, 2

948 05 90 90 · [www.izarratanatorio.com](http://www.izarratanatorio.com)

# IRACHE

## tanatorioak

Tanatorioak: Altsasu – Irurtzun – Lekunberri – Betelu – Leitza

"Betidanik"

☎ 948 19 70 70

🐦 @Grupolrache

📘 Grupolrache

🌐 [www.tanatoriosirache.es](http://www.tanatoriosirache.es)



Zabaletak eta Ezkurdiak dena eman nahi dute bihar Labriten. ARTXIBOA

## Nork esan du partida garrantzitsua ez denik?

**PILOTA** Finalerako sailkatuta dauden Elezkano II.aren eta Zabaletaren kontra ariko dira Binakakotik kanpo geratu diren Ezkurdiak eta Tolosa bihar Labriten. Arbizuarrak txapelketa ongi bukatu nahi du eta Zabaletak zenbakiak handitzen jarraitu nahi du

Binakako Txapelketako finalerdietako 3. eta azken jardunaldia jokatu da asteburuan. Peña-Albisuk eta Altuna-Mariezku-renak igandean Bilbon jokatu duten partidatik aterako da txapelketako bigarren finalista, Elezkano II.a eta Zabaleta dagoeneko finalerako sailkatuta baitaude. Beraz, Elezkanok eta Zabaletak bihar Ezkurdiaren eta Ladis Galarza ordezkatu duen Tolosaren kontra Labriten jokatu den partidaren, txapelketari begira ez da ezer erabakiko, baina bi bikoek partida irabazi nahi dutela oso argi dute.

**Zabaleta, zenbakirik onenekin** Elezkano eta Zabaleta 2000 urtetik hona egin diren zenbaki onenekin iritsiko dira finalera. Jokatu dituzten 16 partidetatik 13 irabazi dituzte eta 3 galdu. Eta finalerdietan jokatu dituzten bi partidetan soilik 15 tanto egin dizkiete. Kondaira hori hobetu nahi dute, finalerdietako hiru jardunaldiak irabazita.

Txapelketa aurkeztu zenetik 2021eko Binakakoa irabazteko bikote faboritoa izan dira, eta jardunaldiz jardunaldi argi utzi dute. Primerako bikotea osatzen dute, ikusgarri dabilta eta lezioa ematen dute, bata bestearen atzetik. Haiek jokatzeko ikustea gozamen hutsa da. Jose Javier Zabaleta egungo atzelaririk onena dela eta gainontzekoak baino koska bat gorago dagoela esatea ez da berria. Zabaletarik onenaren aurreangaude, eta Elezkanok oso ongi daki bera laguntzen. Etxarrengo atzelaria oso perfektionista dela jakina da; bere esanetan, beti dago hobetzeko zerbait. Baina berak ere onartu behar izan du partida onak egiten ari direla. "Uste dut biek partida on egin dugula, bikote gisa ongi funtzionatu dugu eta hori da onena" nabarmendu zuen Zabaletak igandean Bilbon, Peñari eta Albisuri 22 eta 8 irabazi eta gero.

Hortaz, beraiek dira faborito nagusiak bihar, larunbata, La-

briten, Ezkurdiak eta Ladis Galarza ordezkatu duen Tolosa irabazteko. Eta, bide batez, baita maiatzaren 9an jokatu den final handia irabazteko ere.

**Ezkurdiak gehiago merezi zuen** Aurreko larunbatean Ezkurdiak eta Galarzak 21 eta 22 galdu zuten Altunaren eta Mariezkurrenaren kontra, eta finalean egoteko aukerarik gabe geratu ziren. Ezkurdiarendako kolpe latza izan zen; bera izan zen partidako onena, zalantzarik gabe. Galarzak pilota ugari galdu zituen, urduri antzera ibili zen, eta hori ihes egin zuten partidak, tanto bakar-rerengatik. Ezkurdiak aitortu duenez, "penaz eta guztiz amorratuta" bukatu zuen, finalerdie-

**"BINAKAKO TXAPELKETA ONGI BUKATU NAHI DUT, SENTSazio ONEKIN" JOSEBA EZKURDIA**

tan lan ona egiteko itzaropena baitzuen. "Finalean egoteko aukerak ihes egin digu, edo gutxienez bukaerara arte borrokatzeko aukerak, xehetasun txikiengatik" azaldu zuen.

Partidako onena izatea askotan ez da nahikoa. Tentsioak, presioak eta urduritasunak Ladisengan eragina izan zuten. Arbizuarra bera laguntzen saiatu zen, baina azkenean ez zen posible izan. Bikoteak ezin izan du finalerako sailkatu, baina txapelketa ona egin dutela ezin daiteke ukatu, nahiz eta irregular samar aritu. Lehen helburua play-off postuetan sailkatzea zen; hori lortuta, play-offak gaintitu zituzten eta finalerdietarako sailkatu ziren. Pena, tanto bakar baten alde-erengatik finalerdietan aukera gehiago izan ez izana. "Orokorrean txapelketa ona egin dugu, bizpahiru partida kenduta. Pozik egoteko modukoa da" azaldu du Ezkurdiak.

Larunbatean ez dute ezer jokoa, baina Labriten jokatu den partida garrantzitsua da Ezkurdiarendako. Arbizuarrak ongi bukatu nahi du txapelketa, sentsazio onekin. Txapelketaren azken txanpara ongi iritsi dela uste du, txisparekin eta konfiantzarekin, eta bide horretatik jarraitu nahi du. Ladis Galarzak eskuin eskua minduta bukatu zuen aurreko partida, eta Xabi Tolosak hartuko du bere tokia. Aurrean Elezkano eta Zabaleta izanen dituzte, txapelketan euren borrokoak izan direnak. "Txapelketako bi partidatan gure gaitetik pasa ziren. Ea larunbatean ez den berdina gertatzen. Izugarri ari dira jokatzeko. Jose dominatzaile petoa da, eta Danelek argitasunez jokatzeko du" adierazi du Ezkurdiak.

Ezkurdiak badaki Zabaletarekin batera txapel bat irabaztea zer den. 2018an lortu zuten. Arbizuarrarendako aurrelari berezia da Etxarrengo. "Izugarri jokatzeko du, eta jotze berezia du. Txapela irabazi genuenetik Josek pauso bat eman zuen aurrera, mentalki. Lehiakorragoa da, konstanteagoa, gehiago sufritzen daki eta izugarri jokatzeko ari da. Diferentziak markatzen ditu. Bera jokatzeko ikustea gozamen da. Pilota jotzen ez dut bera bezalakorik ikusi, eta Txapelketa dominatzen ari da" azaldu du.

Binakakoa bukatuta, Buruz Burukoa ongi prestatzea da Ezkurdiaren hurrengo erronka.

### 1. MAILA AUTONOMIKOIA

**12. JARDUNALDIKO EMAITZAK**  
Zaramonza- Lagun Artea **1-2**

#### SAILKAPENA

1. MAILA AUTONOMIKOKO 1. MULTZOA

1	Avance Ezkabarte	29
8	Lagun Artea	10

#### HURRENGO JARDUNALDIA

##### IGANDEAN

**17:30** Lagun Artea - Beti Casedano  
(Zelai Berr)

#### Iker Anduezenen primerako debuta

Lagun Arteak garaipen garrantzitsua lortu zuen Arronizen. Zaramonza aurreratu zen, baina bana berdintzea lortu zuen Unai Zubiriak. Partida lehiatua, talde nagusiarekin debutatu zuen Iker Andueza jubenilak lortu zuen garaipenaren gola, 77. minutuan. Sentsazio onekin dago talde lakuntzarra, eta etzi Beti Casedano hartuko du.

### ERREGIONALA GIZONAK

**12. JARDUNALDIKO EMAITZAK**  
Liceo Monjardin - Altsasu **4-0**

#### SAILKAPENA

ERREGIONAL MAILAKO 5. MULTZOA

1	Gazte Berriak	24
6	Altsasu	13

#### HURRENGO JARDUNALDIA

##### IGANDEAN

**17:00** Altsasu - Berriozar (Dantzaleku)

#### Altsasuk Berriozar hartuko du

Altsasu Liceo Monjardin taldearen kontra aritu zen Lezkairuko Sotoan. 5. minuturako aurreratu ziren Liceokoak, baina Altsasuk ongi jokatu zuen eta Lezkairuko en erasoei ongi egin zien aurre. Bigarren zatian Altsasuk erasoan jarraitu zuen baina ez zuen aparteko arriskurik sortu. Tamalez, Liceok bi kontraerasoei esker bi gol sartu zituen, eta ondoren laugarrena lortu zuten, penaltiz. Etzi areio zuzena den Berriozar hartuko dute gorritxoek Dantzalekua.

#### MENDI LASTERKETAK

### Elkartasun erronka bihar Lakuntzan

Sarek antolatuta, Lakuntzak elkartasun mendit lasterketa erronka hartuko du bihar, larunbata, 17:00etan. Hiru mendit korrikalari taldek Arangun, Ondatz eta San Saastin batuko dituzte, eta denbora onena zein taldek egingo ote duen, asmatu beharko dute mendit lasterketa jarraituzera hurbiltzen direnek. Apustuak eguerditik aurrera egin ahal dira.



# "Kakun Mainzek nigan asko sinistu du, eta eskertzen diot"

**MAIALEN VILARIÑO MENDINUETA OSASUNAKO FUTBOLARIA**

**FUTBOLA** 18 urteko olaztiarrak 1. mailara igotzeko fasean murgilduta dagoen Osasuna talde nagusian debutatu du eta igandean bere lehen gola sartu zuen Madrilen kontra

**Maider Betelu Ganboa OLAZTI**

Maitane Vilariño Mendinueta (2002-06-30, Olazti) futbolaria Osasuna B taldean hasi zen aurturten, 1. Nazional Mailako 2A multzoan, baina Osasunako lehen taldera egin du salto, igandean bere lehen gola sartu zuen, eta pozez zorutzen dabil.

**Abenduan aipatu zenigun zure ilusioa Osasuna talde nagusian aritzea zela eta ametsa bete duzu. Noiz deitu zizun talde nagusiko Kakun Mainz entrenatzaileak?**

Talde nagusitik Eguberritan deitu ninduten, eurekin entrenamendu batzuk egiteko. Aste batzuk barru lehen taldearekin ostegunero entrenatzen hasi nintzen, gero bi egunez eta orain entrenamendu guztiak talde nagusiarekin egiten ditut, astelehenetan, asteazkenetan, ostegunetan eta ostiraletan.

**Noiz debutatu zenuen Osasuna talde nagusiarekin?**

2. mailako Iberdrola Erronkako lehen faseko azken partidaren ostailaren 28an, Osasunak Zaragozaren kontra jokatu zuenekoan. Aurretik Alavesen kontrako partidarako deitu ninduten, baina egun horretan ez nuen jokatu. **Osasuna talde nagusiarekin debutatzea sekulakoa izango da, ez? Igoera fasean dagoela kontuan hartuta, are gehiago.**

Bai. 1. mailara pasatzeko igoera fasea oso zaila da, eta hain justu une erabakigarri honetan talde nagusitik deitu izana ez nuen inondik inora espero.

**Lesionatuta dagoen jokalariren baten tokia betetzeko deitu dizute ala taldean zure tokia egin duzu?**

Bietatik zerbait. Talde nagusiko Nerea Salinas jokalaria lesionatu zen, baina aurretik ere deitzen ninduten. Zaragozaren kontrako partidaren bera ere bazegoen, eta nik ere jokatu nuen.

**Aurrelaria zara. Osasuna B taldean 10. zenbakia duzu eta talde nagusian 27. zenbakia.**

Talde nagusian 27. zenbakiarekin oso gustura nago. Zortea ematen dit. Zenbaki horrekin segitzen uzten badidate, ni pozik.

**Osasuna talde nagusia 2. mailatik 1. mailara igotzeko borrokan dabil, eta 1. Nazional Mailako Osasuna B taldea 2. mailara igotzeko lehian. Kasualitatea.**

Bai, bi taldeak mailaz igotzeko borrokan daude. Dena den, Osasuna talde nagusiak ez badu 1. mailara igotzea lortzen, Osasuna B ezingo litzateke 2. mailara igo, nahiz eta igoera lortu.



Maitane Vilariño, Madrilen kontra sartutako gola ospatzen. OSASUNA

**Igandean Osasunak Madrid B taldea izan zuen aurkari Taxoaren, igoera faseko 5. jardunaldian. Ikusgarri aritu zineten, 5 eta 0 irabazi zenuen eta zuk sartu zenuen laugarren gola. Zer sentitu zenuen?**

Ezin nuen sinetsi. Maila horretan oso zaila da gola sartzea, eta sekulakoa izan zen... Aurretik, Oviedoren kontra gol bat sartu nuen, baina arbitroak baliogabetu zuen, eta, hortaz, igandekoa izan zen talde nagusiarekin sartu nuen lehen gol ofiziala. Poztasun handia sentitu nuen. Mugikorra mezuz josita nuen, izan ere, Olazti ia guztiak ikusi zuen partida telebistan.

**Igoera fasean laugarren garaipena lortu duzue jarraian, eta hiru jardunaldiren faltan, igotzeko borrokan jarraitzen duzue.**

1. mailara igo ahal izateko 3 partida horiek irabazi behar ditugu, bai ala bai. Sailkapenean bigarrenak gara, Alavesen atzetik, eta eurek gu baino 2 puntu gehiago dituzte. Hortaz, guk irabazteaz gain, Alavesek partidaren bat berdindu edo galdu beharko luke, bestela bera igoko litzateke. Beraz, 3 final ditugu aurretik, irabazi beharreko 3 final.

**"1. MAILARA IGOTZEKO HIRU FINAL DITUGU AURRETIK, IRABAZI BEHARREKO HIRU FINAL"**

**Azken hiru partidak noren kontra jokatuko dituzue?**

Asteburu honetan atsedean jardunaldia dugu, eta datorren asteburuan Oviedoren kontra jokatuko dugu, Oviedon; maiatzaren 15eko asteburuan Atletico de Madrid hartuko dugu Taxoaren, eta maiatzaren 29ko asteburuko azken jardunaldian Racing izango dugu aurkari Santanderren. Hirurak talde oso onak dira.

**Animoz nola zaudete?**

Batetik ilusio askorekin, baina bestetik urduritasunarekin. Ongi gabilta, baina Alaves ere ongi ari da. Alavesek talde oso ona du, asko jokatzen dute eta oso zaila da haiek irabaztea. Madrid, Oviedo eta Atletico de Madrid taldeen kontra aritzea falta zaie.

**Beraz, azken unera arte hatzak gurutzatzen...**

Bai, baina guk gurean pentsatu beharra dugu; gureak irabazten ez baditugu, ez dugu ezer egiterik.

**Nolakoa da Osasunako Kakun Mainz entrenatzailea?**

Asko eskatzen digu, baina normalea da. Ni oso pozik nago berarekin; nigan sinistu du, eta espero dut eman dizkidan aukeretan ongi aritu izana.

**Biokimika ikasten ari zara. Nola moldatzen zara?**

Ongi. Orain entrenamendu bat gehiago dut astean, baina moldatzen naiz. Entrenamendu aurretik eta ondoren ikasten dut, eta klaseetan adi egoten saiatzen naiz, bestela... (kar, kar...)

**Emakumezkoen futbol gora doa.**

Izugarri. Lehen maila baxuagoa zegoen. Partidak askoz ere zailagoak dira, eta hori ona da emakumearen futbolarako; geroz eta zailagoa izan, maila handiagorekin seinale. Klubaren babesarekin, eta komunikabideetan ere gure berri ematen du klubak. Iaz nik ez nuen emakumeen taldeei buruzko horrenbesteko argazki, aipamen, txio eta informaziorik ikusten. Nabari da, eta asko gainera. Eta kalean jendeak galdetzen digu.

**Berritutako Sadar estadioan egon zara?**

Bai. Oso polita da, bai kanpotik eta baita barrutik ere. Noizbait han jokatzea espero dugu, eta lehenengo mailan baldin bada, askoz hobe! (kar, kar...)

**Denboraldiari zer eskatuko diegu?**

Osasuna talde nagusia 1. mailara igotzea eta 1. Maila Nazionalleko Osasuna 2. maila Iberdrola Erronkara igotzea. Hori denboraldi borobila litzateke.

# Ibilaldiaren ordeztan, Mendi Jarduerak

**MENDIA** Sakanako Ibilaldia aurreko larunbatean zen egitekoa, baina ezinezkoa izan da. Haren ordeztan Iratxo elkarteak Irurtzongo Mendi Jarduerak antolatu ditu. Pandemiaren egoeraren garapenaren arabera Sakanako Ibilaldia beranduago egitea aztertuko dute

**Maidar Betelu Ganboa** IRURTZUN Aurreko larunbatean, apirilaren 24an, Irurtzongo Iratxo elkarteak antolatzen duen Sakanako Ibilaldia zen egitekoa, baina pandemia dela eta, bigarren urtez jarraian apirilaren azken larunbatean ez zen mendi martxa ezagun eta jendetsurik izan. Hutsune hori bete nahian, eta martxan eta bizirik daudela erakusteko, 2021eko Irurtzongo Mendi Jarduerak antolatu ditu Iratxo Elkarteak. "Joan den urtean ere Irurtzongo Mendi Jarduerak prestatu genituen, baina bertan behera utzi behar izan genituen orduan konfinatuta geundelako. Eta aurtengo apirilean Sakanako Ibilaldia bertan behera utzi dugunez, pentsatu genuen zerbaitegin beharra genuela eta Irurtzongo Mendi Jarduerari eustea erabaki genuen" azaldu digu Iratxo elkartearen mendi sekzioko arduradun Manolo Moreno Iribasek.

**Plazaolari lotutako beste bideak** Maiatzaren 7an hasiko dira Irurtzongo Mendi Jarduerak Eurovelo 1, Ederbidea eta Plazaola proiektuei buruzko mahai inguruarekin. Mikel Goldarazanak gidatuko du saioa, eta Irurtzongo alkate eta Plazaolako presidente Aitor Larrazak, Plazaolako kudeatzaile Gustavo Ortiz de Barronek, Biltegi jatetxeko langile Idoia Jusuek eta Joxan Iturralde hartuko dute hitza.

Eurovelo 1, Ederbidea eta Plazaola bide berdea elkarlotzen diren hiru egitasmo dira. Plazaola bide berdea, 1914tik 1958ra bitartean Plazaola trenak Iruñea eta Donostia artean egiten zuen bidea berreskuratu nahi du. Sarasa eta Andoain artean 65 kilometro berreskuratu dira, 43 Nafarroan, Plazaola Partzuergoak



Iratxoko mendi sekzioko kideak. Behean, eskuinean, Manolo Moreno. DORIS VICENTE

kudeatzen dituenak, eta 22,1 km Gipuzkoan, Andoingo Udalak eta Gipuzkoako Diputazioak kudeatzen dituenak. Andoain eta Donostia eta Sarasa eta Iruñea arteko tartekak dira berreskuratzeko falta direnak. "Denok ezagutzen dugu Plazaola bide berdea. Pandemia dela eta, geroz eta jende gehiagok erabiltzen du. Jendea pilaka ibiltzen da asteburuetan eta festa egunetan, bizikletan, oinez... Ikaragarri. Eta ez bakarrik Plazaolan. Trinitatera jende asko igotzen da, baita Axitako gotorlekura, gertuko mendi ibilbideetara... Jende asko dabil Irurtzun eta Larraun aldean. Latasako Biltegi taberna ere beti beteta egoten da, eta Irurtzongo kaleetan ere mugimendua nabari da" aipatu du Morenok.

## Eurovelo 1 eta Ederbidea

Eurovelok Europan barna prestatutako distantzia handiko 15 ibilbide jasotzen ditu, bizikletan egiteko. Lehenengo ibilbidea, Eurovelo 1 Atlantic Coast Route, Norvegiako Northe Capen hasten da, Ingalaterratik eta Irlandatik igaro eta gero, Frantzia sartzen da, Nantesen, eta itsasertzetik, Donostiara heldu eta Bidasoatik barrena Nafarroara sartzen da. Plazaolako bide berdeko eremu bat hartzen du, eta gero, Iruñea, Gasteiz, Burgos, Valladolid, Salamanca, Merida eta Huelvalotzen ditu, Portugalgo Algarvera sartu eta Lisboan despeditzeko. Eta Ederbidea Baiona, Donostia eta Iruñea bizikletaz ibiltzeko bideen bitartez elkartuko dituen egitasmoa da, 238 kilometroko sarea, Euroveloko 1 ibilbidearen barruan dagoena. Plazaola Partzuergoa da sustatzaileetako bat, eta Doneztebe eta Irurtzun arteko bizikleta bidea jasoko du.

"Eurovelo Europa mailako egitasmo oso zabala da. Irurtzunen eta Imotzen zati handi bat hartzen du. Plazaolaren bidetik doa, baina gero desbideratzen da eta Orokiatetik gainetik pasa, Orokiatetik jaitsi eta gero Bidasoa aldera jotzen du. Bide hori jada prestatuta eta markatuta dago, eta nik uste indarra hartuko duela. Jauntsarats alde horretan zubiak eta bide zati berriak egin dituzte. Egitasmo hauen guztien berri emango digute mahai inguruan. Ibilbide horien gure hurbileko zatia guztiz markatuta eta prestatuta dago, eta, beraz, jakin mina sortzen du" nabarmendu du Morenok.

**Plazaolan eta mendian jende asko** Iratxoko mendi sekzioko buruak esan bezala, pandemiarekin mendizaletasunak eta ibilaldi eta txangoek gora egin dute. Mendi federatu kopurua izugarri hazi da. Alde positiboa du, baina baita negatiboa ere, tarteka masifikazioa ekartzen duelako. "Zenbait lekuetara joatea ezinezkoa izaten da sarritan. Trinitatera jende asko igotzen da, eta Irurtzongo Plazaola aparkalekua ere beteta egoten da. Ildo honetan, autokarabanendako leku polita prestatu dute, aurki, maiatzean zabalduko dena. Kanpoko jendea dabilena nabaritzen da. Bizikletan dabilen jende asko ikusten da herrian. Hain zuzen ere hori da pandemiarekin gora egin duten beste sektore bat, bizikletena" dio, irribarrez, Morenok.

## 'Cholitas' eta Annapurna

Irurtzongo Mendi Jardueretan *Cholitas* filma egonen da ikusgai maiatzaren 9an. Emakume boliviar batzuk Aconcaguara egin zuten espedizioaren berri ematen du. "*Cholitas* ikusteko gogoia dut. Oso erakargarria iruditzen zait, bitxia" dio Manolok. Bestalde, Unai Razkinek, Haizea Martinez de Aldak, Naiara Martinezek eta Joseba Gandariasek aurkeztuko duten *Annapurnako Itzulua* ere ez du galdu nahi. "Irurtzunen eta inguruan bizi diren bi bikote dira, eta proiektzioan Annapurnan nola joan zitzaizen konstatuko digute. Ez da beti kanpora joan behar, hemengoek ere egiten dutena baloratu behar da" nabarmendu du Morenok.

## Bilboko Mendi Filmeko onena

Maiatzaren 16an 2020ko Bilboko Mendi Film Festibaleko Sail Ofizialeko hiru dokumental eskainiko dira, bi labor *Aterpean* eta *Charge* eta beste luzea, *Edmund Hillary Ocean To Sky*, Bilboko Mendi Film Festibaleko Sari Nagusia jaso zuen dokumentala. "Mendi Film festibaleko Aitor Elduaiek aurkeztuko ditu. Festibalak geroz eta garrantzia gehiago du, ea zer dioen Elduaiek" gaineratu du Morenok.

**"PLAZAOLA BIDE BERDEAK IZAN DUEN GORAKADA IKARAGARRIA DA" MANOLO MORENO**

### Iratxo, mendia baino gehiago

Iratxo mendi talde bat baino askoz ere gehiago da. Elkarrekin ederra dute, primerako tokian, lorategi handiarekin eta botxategiarekin. Baina elkarrekin, gainontzekoak bezala, itxita dago. Eta elkarrekin antolatzen dituen Botxa Txapelketak ere ez dira jokatzeko. "Lorategiko belarra mozten dugu, mantenu lanak egin, juntakoen eta mendi taldekoen bilerak eta gutxi gehiago. Garbiketa ere egiten du bertan aritzen den langileak, baina elkarrekin itxita dago. Jendeak hutsune hori nabaritzen du, baina ezin denean ezin da" nabarmendu du Morenok.

Iratxo elkarrekin urtero mendi irteeren egutegia egiten du, baina orain bakoitza bere kabuz doa mendira, talde txikitik; ez dira irteera jendetsuak antolatzen. "Taldea txikitik biltzen gara. Igandean Iturraskarrik -iturriak, bideak eta beste berreskuratzeko egitasmoa, udalen eskaerak asetzen dituen - garbitu, presatu eta markatu zituen bideetako eremu bat berrikusteko lana egin genuen, Goldaraztik, Urri-tza, Beramendi, Udabe... zati hori guztia nola zegoen ikusten. Nahiko ongi zegoen, egia esan. Orain ezin dira mendi irteera handiak egin" gaineratu du Iratxoko mendi ataleko buruak.

### Sakanako Ibilaldia bizirik dago

Egoerak hobera egiten badu, Iratxok Sakanako Ibilaldia an-



Mendizaleak Txurregin gora, Sakanako Ibilaldian. IRATXO, ARTXIBOA

tolatzea ez du baztertzen. "Dirulaguntzak eskatzeko epea apirilean bukatzen zen eta badaezpada eskaera egin eta dokumentazioa aurkeztu genuen. Horrekin adierazi nahi dugu zerbait antolatzeko prest gaudela beti ere pandemiaren egoeraren eta baldintzen arabera eta osasun agintarietara markatzen dituzten arauen arabera. Ikusiko dugu udak zer dakarren, aurrerago erabakiko dugu. Gutxienik uztaile arte itxaron beharko da" dio Morenok.

Sakanako Ibilaldia prestatzea ia urte osoko lana izaten da, baina Iratxokoek faltan botatzen dute. "Lana izaten da, baina beste alde batetik hutsunea ere bai. Faltan botatzen dugu. Elkartera hogeita hamarren bat gazte sartu ziren duela urte pare bat, baina gainontzeko bazkideak adinean gora goaz, eta beldurra

ere badugu. Saltsa honetan ezin duzu jendea gehiegi inplikatu eta arriskuan jarri. Dena den, badakit pasa den larunbatean gazte talde batek, Iratxoko bazkide berri batzuk tartean, bere kabuz Sakanako Ibilaldia egin zutela. Ez zuten eguna ahaztu. Ibilaldimina izan zuten (kar, kar...). Eta beste talde batek, hauek helduagoak, asteburu honetan egiteko asmoa dute, aurrekoan ezinezkoa izan zutelako. Beraz, Sakanako Ibilaldia bizirik dago" kontatu du, pozik eta harro, Manolo Morenok.

## "LARUNBATEAN TALDE BATEK SAKANAKO IBILALDIA EGIN ZUEN; BIZIRIK DAGO" MANOLO MORENO

## Mank-en eskalada hastapen ikastaroa maiatzean izanen da

**ESKALADA** Ion Gurutz Martinezek gidatuko du, 14 urtetik gorakoendako da eta izena ematea zabalik dago

Sakanan eskaladan aritzeko makina bat toki eder daude, mendi eta harkaitzez inguratuta baikaude: Ziordia, Olazti, Urdiain, Uhartte Arakil, Zuhatzu, Irurtzun... Eskaladak izugarri erakartzen du, baina sarritan kirol honetan asteko lehen pausoa ematea kostatzen da, materiala eta esperientzia duen norbaiten argibideak behar direlako. Hain zuzen ere, Sakanako Mankomunitateko Kirol Zerbitzuak horregatik antolatzen du eskalada hastapen ikastaroa. Amaia Gerrikagoitia kirol teknikariak aipatu duenez,

harrera bikaina izaten du. "Oso ongi pasatzen dute. Eskalada zer den ikusi eta probatzeko aukera dute, lehenengo hurbilketa izaten da" dio teknikariak.

Aurtengoa maiatzaren 21ean, 22an eta 23an izanen da, eta izena ematea zabalik dago, maiatzaren 14ra arte edo lekuak agortu arte, Mank-eko Kirol Zerbitzuan (948 464 866, [kirolak@sakana-mank.eus](mailto:kirolak@sakana-mank.eus)). Prezioa 39 eurokoa da eta 14 urtetik gorakoek zuzendua dago.

Ikastaroa esperientzia zabala duen Ion Gurutz Lazkoz Martinezek



Eskalada ikastaroa Eginon. ARTXIBOA

eskalatzaile arbizuarrak gidatuko du. Helburua haitzean eskalatzeko oinarrizko ezagupen eta teknikak lortzea da. Arnesa, katuak eta kaskoak behar dira, eta norbaitek ez baditu, antolaketak utziko dizkio. Maiatzaren

21ean 18:00etatik 20:00etara arlo teorikoa landuko da Mankomunitatearen egoitzan, Lakuntzan. Eta maiatzaren 22an eta 23an, goizeko 10:00etatik 18:00etara arlo praktikokoan murgilduko dira, Uhartte Arakilen edo Eginon.

## Irurtzungo Mendi Jarduerak

### Maiatzak 7, ostirala

- **20:00 Mahai ingurua: Eurovelo 1, Ederbidea, Plazaola.** Hizlariak: Gustavo Ortiz de Barron (Plazaolako kudeatzailea), Aitor Larraza (Irurtzungo alkatea eta Plazaola Partzuergoko presidentea, Idoia Jusua (Biltegiako langilea) eta Joxan Iturralde. Moderatzailea: Mikel Goldarazena. Dohainik.

### Maiatzak 9, igandea

- **20:00 'Cholitas' filma.** Gaztelaniaz. Sarrera: 5 euro.

### Maiatzak 14, ostirala

- **20:00 'Annapurnako Itzulia' proiektzioa.** Aurkezleak: Unai Razkin, Haizea Ramirez de Alda, Naiara Martinez, Joseba Gandarias. Dohainik (aurretik erreserbatu).

### Maiatzak 16, igandea

- **20:00 2020ko Mendi Film Festibaleko Onena.** Proiektatutako dokumentalak: *Aterpean Aterri* (4 minutu), *Charge* (4 minutu) eta *Edmund Hillary Ocean To Sky* (106 minutu, Mendi Film Festibaleko Sari Nagusia). Aurkezlea: Aitor Etxebarria. Sarrera: 5 euro.

**Sarrerak:** Ekitaldiak Kultur Etxean izanen dira. Aforo mugatua dagoenez, sarrerak lehenbailehen erostea gomendatu dute: 948 600 412, 660419 610, [kulturetxea@irurtzun.eus](mailto:kulturetxea@irurtzun.eus).



Ruben Mendieta erreleboetan. GRUPOMPLEO

## Kintanaren eta Mendietaren Grupompleok ongi hasi du Liga

**ATLETISMOA** June Kintana diskoan onena izan zen eta Ruben Mendieta erreleboetan hirugarrena

Aire zabaleko Espainiako Ohorezko Mailako Atletismo Ligako lehen jardunaldia jokatu zen asteburuan Iruñean, Larrabiden. Iruñeko Grupompleo Pamplona Atletico taldeko atletak ikusgarri aritu ziren, emakumezkoen sailkapenean Grupompleo bigarre-na izan baitzen (178 puntu), Atletismo San Sebastian taldearen atzetik (204 puntu), eta gizonnezkoetan hirugarrena (181 puntu), Real Sociedad (229 puntu) eta SG Pontevedra (181 puntu) taldeen atzetik.

June Kintana Larraza disko jaurtiketan eta pisu jaurtiketan aritu zen. Bakaikuarra emakumezkoen disko jaurtiketako txapelduna izan zen (47,83 m), eta pisu jaurtiketan zazpigarrena (10,07 m).

Ruben Mendieta Alegria atleta olaztiarrak ere lan ona egin zuen bere ohiko entrenamendu tokian den Larrabiden. 800 metroko lasterketan laugarren sailkatu zen (1:56.44) eta 400 metroko erreleboetan podiumera igo zen, Lucas Moreno, Oscar Urdanoz eta Iker Alfonso atletekin batera, laukotea hirugarren sailkatu baitzen (3:20.30).

Beraz, Grupompleo Pamplona Atletico indartsu ekin dio Aire Zabaleko Espainiako Ohorezko Mailako Atletismo Ligari.

# Garcia de Eulateren itzulera half triatloira

**TRIATLOIA** IX. Nazioarteko Infinitri Half Peñiscolan (1,9 km-90 km-21 km) sailkapen orokorrean 37. sailkatu zen altsasuarra. Triatloian aritu izanak poztu du gehien eta hurrengo helburua maiatzean jokatu den Iruñeko Half Erronka da

Igandean IX. Nazioarteko Infinitri Half Peñiscola triatloi proba gogorra jokatu zen. Bertan aritu ziren triatletek lehenik eta behin 1.900 metro igeri egin behar izan zituzten Peñiscolako hondartzan, segidan bizikleta hartu eta 90 kilometroko ibilbidea osatzeko. Eta bukaeran 21 kilometroko lasterketa egin zuten Peñiscolako kale ederretan barna.

Jordi Montraveta gazteak (Prosan Triatlon) sekulako erakustaldia eman zuen, lau ordutan osatu baitzuen proba (4:00:42). 23 urtez azpiko kategorian ere irabazi zuen Montravetak. Ordu erdira sartu zen Sakana Triatloi Taldeko Sergio Garcia de Eulate Maia. Altsasuarra 37. postuan sailkatu zen (4:37:56), eta bere kategorian, beterranoen 1. mailan, 10. izan zen.

## "Izugarri ongi" pasa zuen

Garcia de Eulate oso pozik dago lortutakoarekin. Gutxiago entrentzen duela aitortu du, eta errendimendua eta lortutako emaitza horren arabera izan zela, baina izan zituen tentsioak onak izan zirela eta izugarri ongi pasatu zuela gaineratu du. "Bereziki triatloian aritu izanagatik nago kontentua. Oso proba polita izan zen, gogorra aldi berean, eta bertan aritu ziren triatleten



Proban aritu ziren triatleten maila sekulakoa zela adierazi du Garciak. UTZITAKOIA

maila sekulakoa zen. Maila handia zegoen. Baina oso gustura ibili nintzen eta gozatu ederra hartu nuen" azaldu du.

Garcia de Eulateren hurrengo erronka maiatzaren 15ean jokatuko den Half Triathlon Iruñea Erronka izanen da. Alkozko urtegiaren 1.900 metro igeri egin ondoren, bizikleta hartu eta Iruñera bitarteko 85 kilometroak egin beharko dituzte triatletek, Iruñean 19,5 kilometroko korrikaldia egiteko. Garcia de Eulate eta Mikel Astiz sakandarrak daude parte hartzaileen artean.

## Sakandarrak ongi Larragan

Igandean V. Larraga Duetloia jokatu zen (5 km korrika -21 km bizikletan -2,5 km korrika). Ivan Urman (42:31) eta Uxua Idiazabal (1:15:30) izan ziren azkarrenak. Eukeni Goikoetxea 20. sailkatu zen (1:07:33), Iñaki Alvaro 39. (1:10:19), Juan Luis Maiza 42. (1:11:02), Jose Ignacio Mikeo 48. (1:11:51), Juan Carlos Gomez 49. (1:11:51), Jon Lapuente 111. (1:20:53) eta Peio Bergara 117. (1:23:38). Errelebotan Jorge Iradi eta Dayana Perkaz 13. postuan iritsi ziren (1:19:06).

Garro (Sakana Group) 4. sailkatu zen, Mikel Uncilla (Quesos Albeniz) 6. eta Ander Villalobos (Quesos Albeniz) 10. Top Tenean Sakanako taldeko bost txirrindulari sailkatzea azpimarratzen da. Alex Lopetegi (Quesos Albeniz) 18. sartu zen eta Xabier Borrega (Quesos Albeniz) 21.

Kadeteak, aldiz, Atarrabian aritu ziren. Manex Zufiaurre (Sakana Group) 5. sailkatu zen, eta Quesos Albenizko Iker Agudelo, Mikel Regil eta Asier Etxeberria 8., 9. eta 11. postuetan.

# Hugo Aznar txapeladun eta Jon Erdozia hirugarrena Beran

**TXIRRINDULARITZA** Quesos Albenizkoa bakarrik iritsi zen helmugara eta Sakana Groupkoa 53 segundora sartu zen

Igandean juniorren mailako XLIII. Felix Errandonea Memoriala jokatu zen. Soilik 27 txirrindularik lortu zuten proba despeditzea, eta tropela oso zatikatuta iritsi zen helmugara. Guztien buru, Quesos Albeniz-Burunda

taldeko Hugo Aznar izan zen (1:43:00). Korteko txirrindulariak 23 segundo atera zizkion Bar Restaurante El Volante taldeko Xabier Zabalari, eta 53 segundo Sakana Group-Aralar taldeko Jon Erdozia etxarriarari. Unai



NAFARROAKO TRIATLOI FEDERAZIOA

# Lakuntzaren Saltoki, bigarrena

**DUATLOIA** Asteburuan kategorian txikiko Espainiako Taldeko Duetloi Talentu Ligako jardunaldiak jokatu ziren Alcobendasen. Saltoki Triatloi Taldearekin aritu zen Hegoi Lakuntza Zelaia altsasuarra, eta erlojupekoan bigarrenak izan ziren Saltokikoak. Nagusienez txapelketan, Saltokiko gizonen taldea txapeladun izan zen, eta emakumezkoena bigarrena.



J.L. GORRIA

# Xota, zauria sendatzera

**ARETO FUTBOLA** Asteazkenean El Pozoren kontra galdu eta gero berriro altxatzea dagokio Osasuna Magna Xotari. 1. mailari eusteko borrokan bihar, larunbata, partida garrantzitsua dute berdeek arerio zuzena duten Cordoba taldearen kontra. Martil eta Fabinho baja dira eta Imanol konfinatuta dago, baina egoerari buelta eman beharko dio Xotak.

**Erkuden Ruiz Barroso** ALTSASU

Extremaduran jaioa, bi urte zituenean Altsasura bizitzera joan zen bere familia eta hamaika urte zituen arte bertan bizi izan zen. Adin horrekin aita lanean ari zela tren batek harrapatuta hil zen, eta Mari Pinto Balsera Palentziako barnetegiko batera ikastera eraman zuten. Bukatutakoan herrira itzuli zen, heldua zenean Gasteizera bizitzera joan zen arte. Arabako hiriburuan bizi den arren, Altsasuri lotuta jarraitzen du eta haurtzaroko eta gaztetako oroitzapenak testuetan islatzen ditu. Urteetan idatzitakoa *Una vida entre letras* liburuan bildu du. Liburua dagoeneko salgai dago Altsasuko Arkatz eta Liburunda liburu dendetan.

**Nola sortu zenuen liburua?**

Duela 28 urte literatura tailer batean izena eman nuen. Gaur egun, horrelako tailer asko daude, baina garai horretan egiten zen lehenengoetarikoa zen. Gero helduendako ikastaro batean ere izena eman nuen. Bertan idazten nuen guztia gordetzen nuen. Hainbeste lan egin nituenez, pena ematen zidan egindako hori guztia gordeta gelditzea, eta liburua egitea erabaki nuen.

**Zergatik orain?**

Jose Crespo Altsasuko lagun batek nire lan asko irakurri ditu, eta beti esaten zidan liburu bat idatzi behar nuela. Azkenean, kasu egin diot.

**Zergatik eman zenuen izena taillerrean?**

Betidanik gustatu izan zait idaztea. Hitz egiteko orduan hitz urria naiz, baina idaztean guztiz desberdina naiz. Lasai nago, eta gauzak ateratzen zaizkit. Tailerreko irakaslea Rosa Plazaola Fernandez de Rosategui zen, Altsasurekin harremana duena ere. Idaztera bultzatzen zidan ere. Literatur lehiaketetan parte hartzerantz animatzen ninduen. Hainbat sari irabazi ditut, liburuan aipatzen dudak bezala. Idazten hasi nintzenean beti Altsasuri eta haurtzarorari buruz hitz egiten nuen, eta berak esaten zidan Altsasu askatu behar nuela eta beste gauzei buruz hitz egin behar nuela. Baina Altsasuri buruz hitz egiteagatik 1996. urtean Zizurko literatur lehiaketa bateko lehenengo saria eman zidaten *Camiño de Otaí* lanagatik. Haurrak ginenean han jolasten genuen. Narrazio laburreko eta poesiako lehiaketa askotara aurkeztu naiz.



Maria Pinto Balsera, idazlea. UTZITAKOIA

# "Liburuak Altsasuko nire bizipenak biltzen ditu"

**MARIA PINTO BALSERA** IDAZLEA

Altsasuko oroitzapenekin eta irudimenetik sortutako beste hainbat testu hartu eta 'Una vida entre letras' liburuan bildu ditu Gasteizen bizi den idazleak

**Eta Altsasu alde batera utzi zenuen?**

Jarraitu nuen. Ez nion Rosari kasu handirik egin. Bertan bizi nintzenean inauteriak ospatzen hasi ziren, eta poema bat merezi zutela pentsatu nuen, Altsasuko festei buruz ere asko hitz egiten dut. Ermitei buruz, Altsasuko dendak eta tabernak errepasatzen ditudan beste kontakizun bat dago... Gehien bat nire haurtzarorari buruz hitz egiten dut.

**Zure memoriak dira?**

Nire bizipenak. Zati handi batean bai. Liburua atalka banatuta

dago: intimitatea, fantasia, Altsasu eta erotismo pixka bat ere badago. Lotsak galdu behar genituela esaten zigun Rosak.

**Zer dauka Altsasuk?**

Urte asko bizi izan nintzen bertan. Extremaduran jaio nintzen baina bi urterekin nire familiak, familia askok bezala, migratu zuten. Palentzian pasa nituen sei urte horiek kenduta, nire haurtzaroko guztia Altsasun bizi izan dut Gasteizera etorri nintzen arte. Markatu ninduen. Haurtzarora pertsona baten bizitzan gehien

markatzen duen aroa dela uste dut, eta bertan bizi nuen, oso presente daukat.

**Zenbat denbora eskaini diozu liburuari?**

Aurretik idatzitako lanekin egin dut. Ez dut ezer berririk sortu. Tailerretan eta etxean idazten nuena jaso dut. Orduan, horiek hartu eta berrikusi ditut. Ez zait asko kostatu. Agian zailena zuzentzea izan da. Urteak pasatzean akatsak ikusten dituzu, eta bueltatxo bat eman diet. Azaroan hasi nintzen liburua sortzeko proze-

suarekin, eta pixka bat nahasia izan da. Arazotxo batzuk egon dira. Baina, beno, dagoeneko salgai dago Altsasuko liburu dendetan.

**Zer sentitu duzu lanak berrirakurtzean?**

Hunkitu naiz. Nire familiari eta amari buruz hitz egiten dut eta barruak mugitu dizkit pixka bat. Metaforak erabiltzea gustatzen zait, eta irakurri ditudanean oso metafora politikak erabiltzen ditudala iruditzen zait.

**Nolako da zure estiloa?**

Oso sentimental eta hunkigarria. Esan bezala, metaforak erabiltzea gustatzen zait. Liburua lasai irakurtzekoa da. Harrapatzen zaituen liburua da; narrazio laburrak direnez eta herrian ezagutzen dituzten istorioak direnez, jendearen gustukoa izango dela uste dut. Testuren bat irakurri dutenek gauza oso politikak esan dizkirate. Izan ere, Altsasu, Altsasu da.

**Literatura tailerretan parte hartzen jarraitzen duzu?**

Ez. Tailerra Jalgi Surgir emakume elkarte batek antolatzen zuen. Bazkide nintzen, diruzaina izan nintzen eta gero idazkaria. Hogei urtez egon nintzen bertan. Gero beste tailer batzuk antolatzen hasi ziren, eta azkenean elkarte desagertu zen. Martxoaren 8an berdintasunaren inguruko literatura lehiaketa handi bat egiten genuen. Sari banaketa Villasuso jauregian egiten genuen. Hamar urtez antolatu genuen lehiaketa, udalak laguntza kendu zuen arte. Poesia errezitalak ere egiten genituen.

**Idazten jarraitzen duzu?**

Orain kostatzen egiten zait. Jendea eskaintzak idaztea ere kostatzen zait. Idaztea gustatzen zait, eta imajinatzen dut noizbait berriz hasiko naizela. Bizitzaren gauzak dira.

**Zure lehenengo liburua da. Gehiago aurreikusten dituzu?**

Baditut beste liburu bat egiteko lan askoz gehiago. Agian honen urduritasuna pasatzen zaidanean beste bat egingo dut. Baina momentuz honekin konformatzen naiz, bide luzea izan da.

**Aurretik, beste zenbait liburutan parte hartu duzu; Dora Salazarren 'Bidezidorrak', esaterako.**

Bai, salazarrek eskatu zidaten eta parte hartu nuen. Aurretik egindako testu batzuk argitalpena egokitu nituen. Begoñak erakusketa egin zuenean ere, bertan nire narrazioak jarri zituzten.



'Hari izpia hartzen' jardunaldietako aurkezpena. UTZITAKOIA

# Euskal kulturaren erronkak eztabaidan

Nafarroako euskara teknikarien sareak, Elkar fundazioak eta Karrikiri topaguneak 'Hari izpia hartzen' jardunaldia antolatu dute. Euskal kulturaren prestigioaren, ikusgarritasunaren eta lurraldearen inguruko hausnarketa sustatu nahi dute

## Erkuden Ruiz Barroso SAKANA

2020. urtean Nafarroan euskal kulturak zituen erronkei buruz hausnartzeko jardunaldiak antolatu zituen Nafarroako euskara teknikarien sareak eta Elkar fundazioak. Besteak beste, euskal kulturaren kontsumoaren kezka, transmisioaren etena, irisgarritasuna, hizkuntza arautuaren falta, eragileak eta dirulaguntza menpekotasuna gaiei buruz hausnartu zuten bertaratu ziren ehun lagun inguruk. Hortik abiatuta eta lehenengo edizioaren arrakasta ikusita, aurten *Hari izpia hartzen* jardunaldiaren bigarren edizioa antolatzea erabaki dute. Bi saio eginen dituzte: Atrarrabian maiatzaren 28an eta Leitzaun uztailearen 1ean.

Elkartasunean antolatutako jardunaldiak dira, Atrarrabaiako udalean egindako aurkezpenean adierazi bezala. Bertan Mikel Oteiza Atrarrabiako alkatea, Joxemari Sors Elkar fundazioko lehendakaria, Castillo Suarez Nafarroako euskara teknikarien sareko kidea eta Sakanako Mankomunitateko euskara teknikaria, Jon Abril Elhuyar fundazioko kidea eta Izaskun Barber Karrikiriko komunikazio arduraduna egon dira. "Poz handia" adierazi du Oteizak.

## Prestigioa

"Hizkuntza eta kultur gutxituek gero eta zaitasun gehiago dituzte zabaltzeko. Eskaintza erraldoi horien aurrean ur tanta bat itsaso erraldoi batean dira". Baina zaila izateak ez dauka ezinezkoa izatea esan nahi, Sorsek aipatu duenez. Horretarako euskarak "erabilgarria eta prestigioa" izan behar duela aipatu du. "Bigarren mailakoa bihurtzen gaitu, prestigio gabekoa, eta hori aldatzea zaila da". Inguruko parejartzea ezinbestekoa da, "ikusgarri izanik euskal kultura lor daiteke".

Euskal kulturaren ikusgarritasuna eta prestigioa, beraz, izanen da Atrarrabian, maiatzaren 22an, eginen den jardunaldiaren hizgaia. Suarezek azaldu duenez, Oskia Ugarte, Uharteko Arte Garaikideko zentroko zuzendarietako bat da. Prestigioa zer den eta zer ez den azalduko du Ugartek. Aurreratu duenez, hitz margua da eta "tranpaz betetakoa", eta lortzeko hainbat bide daude. Bigarren hitzaldia Iratxe Reto-

**JARDUNALDIAK  
MAIATZAREN 28AN  
ATRARRABIAN ETA  
UZTAILAREN 1EAN  
LEITZAN EGINEN DIRA**

laza EHUko irakasleak eskainiko du. Literaturan eta pentsamendu feministan aditua da, eta bere gogoeta kultur esperientziak, kultur produktuek eta imajinarioen munduan sartzen laguntzen dutela izanen da. "Nola egin bide horiek euskal kulturatik egiteko". Azkenengo saioa Bertsozale Elkarte Oihana Iguaranek eta Eli Iguaranek eginen dute. Hizkuntza eta sustapen ataletan lan egiten dute, eta publiko berria lortzeko egin duten lanaren inguruan hitz eginen dute. Eraldatze prozesu batean murgilduta zeuden, eta pandemiak prozesu horretan harrapatu dituzte.

## Kultura eta lurraldea

Leitzaun uztailean eginen den saioan kultura eta lurraldea izanen dute hizpide. Lorea Agirre Jakin aldizkariako zuzendaria eta kazetaria emanen dio hasiera jardunaldiari. Hizkuntza, kultura eta komunitatearen arteko lotura da bere espezialitatea eta egoera kokatuta "eskatu" diote. "Mundua gero eta indibidualagoa eta uniformalagoa da, eta euskal kultura ez dago kanpoan", aipatu du Suarezek. "Badirudi euskal kultura oraindik ez dagoela hausnartuta. Gogoeta egin behar

dugu oraindik". Ondoren, Arantxa Santestebanek eta Marc Badalek hiriko eta landa eremuetako kulturaren inguruan hitz egingo dute. Santestebanek zinemaren munduan lan egiten du, Badal Luzaiden bizi den katalana da, eta Kanpo bulegoa erakundeko kidea da. Landa eremua eta kulturaren arteko loturaz ikertzen ari da Badal. "Landa eremua hiritik definitu dela dio, eta landa eremuan bizi direnak harreman desorekatu horiek hautsi eta beraien nahiak eta abar entzun behar dituzte", aurreratu du Suarezek.

Hausnarketarako jardunaldia da *Hari izpia hartzen*, eta Jon Abrili dagokio eztabaiden gidaria izatea. Ikusgarritasuna eta prestigioaren inguruan Atrarrabian eginen diren saioetan abiapuntua aurreko urteko

edizioan ateratako ideiak izanen dira: ikusgarritasuna lortzeko eskuragarria izan behar duela, erreferenteak sortzearen garrantzia, bizipenak lortzearen beharraz, eremu digitalaren beharraz eta abar. Erantzunak hitzaldien bidez lortuko dituzte. Iaz jarritako haziak "sakontzen eta kontzeptualizatzen" jarraituko dute aurten, "gero proiektuak bihur daitezkeen" gauzak sortuz, Atrilek azaldu bezala. Leitzaun "tokian tokiko kultur ekosistemak sortzeko eta kultur eremuak hezkuntzara gerturatzeko" ideiak landuko dituzte. Kultur kontsumoa areagotzeari buruz hausnartuko dute ere. Helburua, betiere, "elkarrizketa eta eztabaida bideratzea da.

Izena ematea zabalik dago [hariizpiahartzen.eus](http://hariizpiahartzen.eus) webgunean.



BAZTERRETIK

IUNE TRECET OBESO @

## Txertoak herriarentzat

Txertaketaren kanpainarekin aurrera goaz. Badirudi hasierako arazoak konpontzen ari direla eta ondorioz, geroz eta pertsona gehiago txertatu dituzte gure herrietan.

Pfizer, Moderna eta AstraZeneca txertoak iritsi dira gurera. Hiru hauek garatzeko finantziarioa nagusiki gobernuetatik iritsi da, hau da, diru publikotik. Baina ondoren, komertzializazioa industria farmaceutikoaren eskuetan egon da. AstraZenecaren kasuan, gainera, Oxford Unibertsitateko Jenner Institutuak txertoa produzitzeko lizentzia mundu guztiko institutuetara zabaltzea zen hasierako ideia, baina badirudi, Gates Fundazioak lizentzia hau ixtearen alde egin zuela, herrialde txiroenetan txertoa garatzeko modua ezingo zutela kontrolatu, eta, hoberena lizentzia AstraZeneca multinazional farmaceutikoari ematea izango litzatekeela, besteak bertan behera utziz, eta negozio bilakatuz.

Txertoaren banaketan egondako arazoak, edo

irregulartasunak, txertoak negozio izatearen ondorio zuzena dira. Herrialdeak borrokan ibili dira beraien artean, eta ez da kasualitatea munduko herrialderik txertatuaren artean Israel eta Arabiar Emirerri Batuak egotea. Gainera, Pfizerrek Europar Batasunera milioika dosi bidaltzen hasi denean, prezioa igoko duela aditzera eman berri du.

Horregatik da hain garrantzitsua diru publikoarekin sortutakoa lizentzia askearekin argitaratzea. Txertoen kasuan patenteak askatu behar dira, herrialdeen arteko borroka hauek sorrarazi ez ditza eta ez dezaten gure osasunarekin jolastu. Gainera, egun, hain ahaztuta ditugun herrialde txiroenetako herritarrek txertatzeko aukera ere izan behar dute.

Neurri honekin batera, industria farmaceutiko publiko indartsuak behar ditugu. Logika kapitalistatik kanpo dauden laborategiak, non medikamentuak herriarren beharrik kontuan hartuz sortuko diren. Europar Batasuna bezalako aparatuek balio dezatela, behintzat, osasuna oinarri duten industria hauek sortzeko.



Patxi Zubizarreta 'Mugak puskatzeko literatura' hitzaldian.

# Lanpara txiki bat

Tinta gorri, tinta urdin. 'Mugak puskatzeko literatura' hitzaldia eskaini zuen Patxi Zubizarretak. Literatura eta kultura "alaitasunez" eskaini behar dela dio idazleak, baita "barruko zerbait" dela ere. Gauzak kontatzeko "mugak puskatu" behar direla esan du

## Erkuden Ruiz Barroso ALTSASU

New Yorkeko bibliotekako zuzendariak esan zuen liburutegia katarroa zuen eraikin bat zela. Zahartu den eraikin bat, eta kultura alaitasunez eskaini behar dela. "Nik uste kultura alaitasunez eskaintzen dela, eta zerbait afrosiakoia izan behar dela". Patxi Zubizarretaren ustez literaturak eta kulturak "bizitzari aurre egiteko izugarritzko tresnak eskaintzen dizkigu", baita borrokatzeko tresnak ere. Altsasuko liburutegiak Liburuaren egunaren harira antolatutako *Liburuaren astea: Mugak hausten* programaren barruan eskaini zuen asteazkenean Patxi Zubizarreta idazleak hitzaldia Iortia kultur gunean. Asmakizunen, ipuinen eta jokoen artean, literaturak mugak apurtzeko duen gaitasunak azaldu ditu.

Hans Christian Andersen idazlearen figura izan da hitzaldiaren haria. Danimarkarrak ipuin "ilunak" idazten zituen, besteak beste, ipar Europa herrialdeak ilunak direlako: "Eguna oso laburra da. Diotenez lanera joaten

direnean lanpara txiki bat piztuta uzten dute, eta lanetik itzultzen direnean, ilun ilun dagoenean, argitasun hori ikusten dute". Argi horrekin konpainia sentitzen dute. Hori da Zubizarretaren ustez literatura: "Oso barruko zerbait. Konpainia egiten duen zerbait".

### Ipuinak

Andereak ipuin asko entzuten omen zituen. Tartean Sherezaderenak, Ali Baba, Sinbad... Zubizarretak haietako asko itzuli ditu. Sherezaderen kasuan ipuinak jakiteak bizitza salbatu zion; literaturak lagundu zion. "Sultana, neska gazte batekin oheratu eta egunsentian hiltzen zuen. Baina Sherezaderek 1001 gau iraun zituen". Zubizarretan aipatu duen Andersen beste ipuin

**"LITERATURA OSO BARRUKO ZERBAIT DA; KONPAINIA EGITEN DUEN ZERBAIT"**

bat Miseria emakumearena da, laburbilduz: "Miseriak herioarekin tratatu bat egin zuen, eta deitu arte heriotza ez zen emakumearengana joango". Eta oraindik ez omen dio deitu. Oraindik miseria dago munduan. Literaturak mundua ulertzeko aukera ematen du. Baina Miseriaren ipuinari bukaera aldatzeko aukera dagoela uste du Zubizarretak: "Gure lana argia bilatzea da, nahiz eta argi txiki bat izan. Nahiz eta konpainia moduan bada ere. Ez naiz konformatzen bukaera horrekin".

Altsasun zegoela, Zubizarretari Altsasura "kotxeak ikustera zetorren" lagun bat izan du presente: Joxe Arratibel atandarra. Arratibelek etxean "kandelaren argipean" entzundako istorioak idatzi zituen. Ali Babaren itzulpena egiten ari zela Arratibelen *Kontu zaharra* "ezinbesteko" liburuan istorioaren bertsio euskalduna aurkitu zuen: "Ali Baba izan beharrean bi anai ziren eta *Ábrete Sesamo* esan beharrean *Ábrete portas klis klas* esaten zuten". Baina ipuin

berdina da. "Joxek kontatutako ipuin bat Marrakechen edo Tunezen kontatuko ipuin baten berdinak dira". Mugek erakusten dute "berdinak garela". Unibertsaltasuna da.

"Anonimoa emakume izena da". Zubizarretak azaldu duenez, Ali Babarenean neskamea askoz garrantzitsuagoa da. Baina inork ez du bere izena oroitzen: Morgiana. Morgianari esker salbatzen da behin eta berriro Ali Baba. Baina literaturan, ez bakarrik literaturan, askotan gertatzen den bezala gizonak protagonismoa hartzen du, eta emakumeak bigarren plano anonimo batean geratzen dira.

### Literaturan ahaztuak

Bi ardatz markatu ditu Zubizarretak: literatura eta memoria. *Beroki gorria* bere ipuina aipatu du. "Duela gutxi Gernikako bonbardaketaren urteurrena izan zen. Hainbat eta hainbat mutiko joan ziren Ingalaterrara, Mexikora... Hori ere tokatu izan zaigu; itsasontzietan joatea tokatu zaigu guri ere. Baina ez dugu gogoratzen". Ipuinetan "azukrea" oso garrantzitsua dela aipatu du, hau da, istorio positiboak eta alaiak. Baina

**"LITERATURAREN LANA DA BESTEEN LEKUAN JARTZEA, ETA MUGAK HAUSTEA"**

"gatza" ere oso garrantzitsua dela esan du.

### Mugak apurtuz

Generoak nahastu behar direla aipatu du Zubizarretak, "mugak apurtu", ez itxi poesiara, narritabara edo poesiara. "Amestutako" liburu bat sortzea "ederra" dela dio: "Niretzat idaztea da, eskuz, poliki-poliki, hainbat buelta eman ondoren". Ondoren, makinara pasatzea etorriko da, eta "gero dator zuzentzea". Zuzentzea bat eta beste bat, aipatu duenez. Marraskilari baten lanak, adibidez, generoak apurtzen laguntzen du. Zubizarretak urrats bat gehiago eman zuen *Urrezko giltza* liburuarekin; bertan literatura, musika, ahoz-kotasuna eta arte plastikoak uztartu zituen.

Generoen mugak hautsi ez ezik, literaturak kulturareniztasuna bultzatu behar du: "Zerbait onuragarria da". Esaterako, *Urrezko giltza* liburuan hiru erlijio agertzen dira, eta hirurek protagonista berdinak dituzte: "Elkarren arteko tradizio ikaragarria dute". Horregatik, ipuineko pertsonaiak haien artean ipuinak eta kontakizunak elkarbanatzen dituzte. "Orain badirudi elkarren artean eraso behar dutela".

Liburu bat hainbat hizkuntzetan publikatzea ere mugak haustea da. *Beroki gorria* gaztelaniaz dut, baina ez dut publikatzea lortzen. Ez zaie istorioa interesatzen. Disneyko istorio politak kontatu nahi dituzte". Azukrea eta gatza, biek behar dute literatura, errepikatu du Zubizarretak. Baina hizkuntzetatik haratago joan behar da ere, eta, esaterako, bere liburu bat braile lengoian publikatu du.

### Erne

"Nik ez diet esango haurrei edo gazteei gehiago irakurri behar dutela. Neurrian irakurri behar da. Baina erne egon behar dugu". Gaur egun dena oso azkar doa, eta gauzetan arreata jartzeko aukera ez duela aipatu du Zubizarretak. "Hitzak hain gastatuta daude beste modu bat bilatu behar dugula gauzak esateko". Literaturak eta kulturak formula behar dutela dio. "Ez gara konturatzen begi bistan dauden gauzez. Literaturaren lana da besteen lekuan jartzea, eta mugak haustea: formula berriak, genero eta diziplina artekoak".



Jabi Rivero altsasuarra Dinabideko kidea. UTZITAKOA

# "Dinabide nire lanerako aproposa da"

Duela bi hilabete inguru Jabi Rivero altsasuarra lan berri batean hasi zen. Lan egiteko espazio bat behar zuela, eta Irurtzango Dinabidera iritsi zen. Bertan, pertsona gehiagorekin lantokia elkarbanatzen du

## Erkuden Ruiz Barroso IRURTZUN

### 1 Zein da zure lana?

Carlisle Fluid Technologies enpresako merkataritze teknikaria naiz. Pinturak eta itsasgariak aplikatzeko makineriaren salmentan espezializatua. Nire lana bezeroari ahalik eta irtenbiderik onena eskaintzea da, bere beharren arabera.

### 2 Dinabiden hasi zara, zergatik?

Lan egiten dudana enpresa amerikarra da, eta ez du bulegorik hemen egunero joan eta etorri ahal izateko. Beraz, bi aukera nituen: etxetik lan egitea, horrek dakarren guztiarekin edo bulego bat bilatzea Altsasun edo inguruetan. Pandemia urte honetan, etxean bi ume izanda, nahiko traste nituela... Bigarrena aukeratu nuen.

### 3 Nola jakin zenuen Dinabiden aritzeko aukera zegoela?

Interneten *coworking* espazioen bilaketa bat eginez berehala

agertu zen. Bisita gidatu bat eskatu nuen webgunearen bidez. Han, instalazioak ikusita, leku librea zegoela esan zidaten. Orduan, hasiera data adostu genuen, eta kide bezala erregistratu eta instalatu nintzen.

### 4 Zer da 'coworker' izatea?

*Coworkerrek*, berez, lankidea esan nahi du. Baina kasu honetan, lanbide desberdinak dituzten pertsonekin lan egitea da helburua, lantoki berean.

### 5 Eta zer egiten da Dinabiden?

Dinabide Nafarroako Gobernuak finantzatutako erakunde bat da, eta bertan enpresen eraldaketa digitala sustatzen eta bultzatzen da. Horretarako, *coworking* espazio bat izateaz gain, beso robotiko bat (UR3), polimeroen 3D inprimaketako hiru teknologia (MJF, FDM eta CFF) eta metal LMDko 3D inprimaketako bat (Laser Metal Deposition) dituen tailer teknologiko bat du erabilgarri. Einscan pro 2x plus 3D eskannerrak eta

errealitate areagotuko Hololens 2 betaurrekoak ere tailerraren eskaintzaren barnean aurkitzen dira. Teknologia horietan eta beste batzuetan aholkularitza, inplementazio eta trebakuntza ekintzak garatzen dira.

### 6 Zenbat pertsona zaudete?

Egun hamaika pertsona gauden. Dinabideren kudeaketa lanerako bi pertsona, beste lau aholkularitza teknikoan laguntzeko, hiru *coworker* modu fisikoan eta beste bi modu birtualean. Taldeko pertsona kopurua, ordea, etengabe gehitzen ari da. Mugimendua astetik atera handiagoa da.

### 7 Nola laguntzen dizu zure lanean?

Dinabidek nire lana egiteko leku aproposa eskaintzen dit. Espazio zabala eta lasaia, ordenagailuarekin lan egiteko Internetarako konexio onarekin. Bilerak egiteko aretoetan bisitak hartzeko edota bezeroei nire produktuak erakusteko tailerra erabiltzeko aukera daukat ere.

### 8 Nolako da zure lan egun bat?

Normalean, badakit eguna nola hasiko dudana, baina ez dakit non eta noiz amaituko dudana. Ordutegi bat mantentzen saiatzen naiz, baina batzuetan zaila da. Egoera arruntetan, batez ere bezeroak bisitatzea, eskuak estutzea eta aurrez aurre hitz egitea da nire lana. Egoera honek erakutsi digu datorrenera egokitu behar dugula, eta, horretarako, teknologiak izugarri lagundu digu gure bezeroekin harremanetan egoten.

### 9 Eta nola aldatu da zure egunerokotasuna?

Egia esan, bi hilabete daramatzat CarlisleFTen lanean, hau da, Dinabiden daramadan denbora bera. Beraz, ez dut egiten dudana ulertzen Dinabide gabe.

### 10 Esperientzia gomendatzen duzu?

Inoiz ez nuen *Coworking* espazio batean lan egin, eta, egia esan, esperientzia aberasgarria da. Zalantzarik gabe esperientzia gomendatzen dut. Zortzi orduz umeekin pisu batean lan egitea utopia bat da. Eskura ditugun tresnak aprobetxatu egin behar ditugu.

### 11 Nola ikusten duzu etorkizuna?

Bizitzak irakatsi dit etorkizunari hainbeste ez begiratzen eta orainari gehiago begiratzen. Inprobisatzeko prestatuago egon behar dugu, eta planifikatzeko gutxiago. Daukagun denbora aprobetxatzea, zure egunerokotasuna eraginkorra goa izan dadin.

**DISEINUA** GRAFIKOA  
**MAKETAZIOA** KARTEL GINTZA  
 PAPER  
**KOMUNIKAZIOA**  
**IRUDI KORPORATIBOAK**  
**EGUTEGIAK AGENDA**  
**ROLL-UPAK** JATETXE ENPRESA **EUSKARRIAK**  
**PEGATINAK UDAL BULETINAK**  
**LIBURUAK** **WEB DISEINUA** BISITA TXARTELAK  
**FORMATU HANDIKO EUSKARRIAK** **LONAK APLIKAZIOAK**  
**SARE SOZIALAK** **PERTSONALIZATUTAKO EUSKARRIAK** **ALDIZKARIAK** **PUBLIZITATEA**

**gk**  
 DISEINU GRAFIKOA  
 WEB DISEINUA  
 KOMUNIKAZIOA

619 821 436 · 948 564 275  
 info@gkomunikazioa.eus · Foru plaza, 23-1. Altsasu